

東
華
續
錄

東華續錄

同治二十一年

臣王先謙敬編

臣張式恭恭校

夏四月丁丑朔沈葆楨奏自二月二十五日許村碣石之賊分竄藍田胡村山坑一帶道員王文瑞飭副將鄧榮達抽隊助防該逆分路進犯鄧榮達等開礮斃賊甚夥賊卻而復前總兵丁長勝督兵分鈔極力衝突賊遂披靡追殺十餘里斃賊三四百名據生擒賊供僞襄王劉官方僞總統天將劉官幅各率萬餘人由廣德甯邑而來昨從許村各處竄至藍田一帶欲攻破漁亭由婺竄江旋聞賊眾屯踞五鞏橋西小溪口又有由九鞏橋渡河者我軍潛伏不動已午之交鄧榮達等出其不意突出街口丁長勝督隊鈔擊後路賊眾官皇失措紛紛投河丁長勝等合力埽蕩沿途賊屍枕

藉逆首劉官幅經外委謝聘賢矛刺墜馬擒之旋自觸石而死計殺斃溺斃賊匪約三千餘人生擒悍賊二百六十三名旗幟七八百桿洋礮洋槍檯槍各數十件偽襄王劉官方等復糾合偽對王洪春元偽顧王吳如哮等分踞黟縣各鄉由虎嶺分擾柏溪等處距祁城二三十里王文瑞密令防祁五營分路潛出並飛飭丁長勝等向小嶺橫鈔會商皖南道葉兆蘭調勇五百餘名繼進先由長里衝柏溪之中斃悍賊數十名賊漸分隊包鈔適喻勝榮從金字牌一帶擊敗零股繞出柏溪之右羅瑞山由畢家亭鈔出柏溪之左楊海泰由長里出白塔郭德馨由板溪出小柏溪同時並至五路會擊賊大潰亂我軍追過虎嶺復斃賊千餘名臣仍飭跟蹤追剿以防竄越又奏竄撲屯溪草市之賊爲繼果營擊敗退竄簪嶺旋有賴逆大股由巖寺街擾及徽郡之西逆首劉姓分踞離屯

溪二十五里之長林許村一帶劉典統軍進抵屯溪會商王沐進
勦甫抵巖寺街卽見賊巢火發楚軍向街頭衝突王沐揮中右營
從街腰橫入前左營擊散伏賊由街尾寶塔灣包鈔截殺巷戰逾
時斬斃無數賊過橋而遁見探該逆欲糾旌太各股再到草市決
戰如不得逞卽走池州等情其青陽分竄東流逆匪爲沿江礮船
所擊併歸建德會建德羣酋分三路入江其大股從陳家衝擾石
門街窺饒州者爲中路該逆搭造浮橋赴上下游分路過河練勇
力弱未能迎敵遂退至童子渡三月初九日韓進春前隊抵陶家
渡該逆未敢徑進卽於石門洋塘一帶築壘十一日官軍進至許
田橋遇賊千餘人奮力衝擊陣斬數十名賊卽敗退其一股由秧
田坂擾桃樹店窺景鎮者爲左路由太湖盤村東竄與祁門賊合
其一股由東流之香口擾彭澤縣窺湖口者爲右路疊被圍練擊

殺甚多湖口縣城經督臣曾國藩飛飭副總兵萬泰嚴守該逆無隙可乘遂東併石門大股合力窺饒見在大田埠等處徧地賊蹤據生擒賊供沿塘河者已三四萬人逆酋黃汶金胡鼎汶李遠繼均在石門一帶建德後路尙有僞尤王僞蕭王等眾均約期會攻饒州等語臣飛飭韓進春拔隊進剿並飭段起派定四成隊如前途有急卽令遊擊劉勝祥統之進援屈藩已到樂平王德榜已到浮梁各渡口饒防尙屬穩固臣復添派虔字營馳防都昌仁右營填紮貴溪以杜旁竄並飛咨湖南撫臣毛鴻賓等飭道員席寶田迅統所部來江相機協剿至皖南一帶祁門軍情日緊繼果營王沐已由草市前赴漁亭助防草市一帶經劉典派營照料皖北賊勢猖獗鮑超援江之師已改旆北渡扼守無爲州矣 上諭議政王軍機大臣等江西道員王文瑞駐防祁門在漁亭疊次獲勝雖

有斬擒賊未大創著沈葆楨督飭該道等相機進剿將祁夥各匪
歸匪力圖掃蕩無稍鬆勁徽屬之巖寺街防軍屢勝據探稱該逆
見欲糾合旌太各股再到草市決戰如不得逞卽改走池州等情
著左宗棠沈葆楨飭令劉典王沐等將徽州附近各鄉鎮匪股分
投剿洗以期一律肅清如該逆糾大股來犯務當激勵各軍痛加
剿除無任竄犯其由彭澤湖口敗竄之賊東併石門大股合力窺
饒見在大田埠石門街等處賊蹤徧地逆酋黃汶金等欲糾合偽
元王等會攻饒州沈葆楨已飛飭韓進春等拔隊進剿並飭段起
等軍進援布置甚屬周妥著卽嚴飭各軍以剿爲防保固完善地
方勿令匪蹤深入腹地江省團練亦頗得力該撫仍當激勵地方
紳團輔助官軍之不足席寶田一軍已由湖南啟行本日已諭令
毛鴻賓催令迅統所部赴江該撫卽派員迎提令其扼要駐紮以

資得力逆匪不能逞志於皖必將上竄江西恣意蹂躪沈葆楨身任封圻責無旁貸於本省兵力不敷仍隨時與曾國藩左宗棠籌商調派勿致稍有疏失是爲至要將此由六百里各諭令知之○諭前因平瑞奏擬開地利以濟餉需並移營裁兵各摺片當交議政王軍機大臣會同該部妥議具奏茲據奏稱烏魯木齊孳生及各營馬厰地土肥沃該都統所籌擬令商戶人等開墾當年升科並古城濟木薩瑪納斯等處孳生馬厰及各處閒荒曠土各營馬厰騰出地畝逐細丈量招戶承領察看可以布種者自本年爲始照例升科並請飭伊犁將軍葉爾羌塔爾巴哈台各參贊大臣將伊犁各城一律辦理其歸併馬厰及巴里坤移營裁兵均准照辦令該都統等妥議章程覆奏等語烏魯木齊牧馬厰地土脈肥饒地面寬曠見經平瑞將該處閒曠地畝招戶開墾升科並將古城

濟木薩瑪納斯等處孳生馬厰歸併巴里坤厰內騰出地畝一併開墾升科以充兵餉實係經久良圖自應實力經營以裕經費所有清釐段落界限彈壓稽查及豫防拋荒拖欠等弊均著該都統督飭員弁詳慎辦理其馬匹選用挑變及變價銀兩數目均著分晰咨報戶兵二部以備查覈所有商戶人等領馬交價等事並著平瑞密訪詳查毋令委員擡價抑勒致滋擾累其以屯地分給屯兵及裁減綠營兵額遇缺扣畱之處亦係爲節省經費因地制宜起見並著照所議辦理仍著將裁減扣畱名數隨時報部所有未盡事宜平瑞卽會商文祥文永安籌章程具奏巴里坤地方瘠苦兵食維艱該都統擬將滿營兵丁酌畱三百名其餘七百名俱遷移於糧多兵少之區綠營兵丁亦量爲裁減該處形勢是否足資控馭滿營兵應遷駐何地綠營兵擇要安置究屬何地應裁數目

若干均著熙麟常清平瑞商酌歸入該都統妥議章程內詳細具奏至新疆南北各城官俸兵餉需用甚多近來內地軍務未平經費勢難接濟各該城地方幅員甚廣不乏閒曠沃壤自應亟籌開墾以濟餉需著常清景廉錫霖於所屬各城孳生暨營馬廐地及閒荒地畝內一體履勘查明報墾以實邊儲該將軍等務當通籌全局開源接流爲國家力圖久遠之謀不得以無利可興藉詞推卸以空言覆奏了事議政王等摺片均著鈔給閱看將此各諭令知之○戊寅諭內閣前因御史吳台壽奏陳勝保獲罪一摺荒謬誕妄肆無忌憚實爲臺諫中卑鄙無恥之員惟因勝保案情尙未審明未經降旨將該御史懲辦茲據御史劉其年奏稱吳台壽朋黨撓法飾詞挾制並稱伊兄吳台朗夤緣入勝保軍營保至道員花翎招權肆惡中外皆知吳台壽效命私門甘心鷹犬各等語所

論該御史挾私誣罔各情朝廷早經洞悉諒大小臣工亦無不知其奸詐吳台壽甫陞御史卽敢肆意妄爲將來伊於胡底著卽行革職山東候補道吳台朗本係因案革職之員復夤緣勝保軍營招權肆惡此次吳台壽挾私呈奏其爲感激私恩已可概見吳台朗著一併革職拔去花翎以爲夤緣朋比者戒近來科道中因朝廷詔求直言隱惡揚善遂有讒閒忠良袒庇私人冀圖熒惑者殊不乏人該科道以諫爲職宜如何正直剛方指陳得失何得巧爲嘗試顛倒是非朝廷格外優容不加譴責該科道等清夜捫心能無自愧乎經此次訓飭之後務當各矢公忠遇事直陳不得稍存私曲亦不得緘默自容用副厥職至勝保罪案見派王大臣等公同審訊自必權衡至當用協於中無俟揣測爲也將此通諭知之

○唐訓方奏苗沛霖居心狡詐怙惡不悛前次張落刑伏誅後該

逆懼於軍威稟請散練歸農彼時叛逆尙未顯露不得不暫示羈縻乃自僧格林沁統軍北上該逆復以姜台凌投誠被戮等詞搖惑眾心糾集黨與襲攻蚌埠水師營盤經參將張得勝率隊迎擊斃賊多名詎逆黨潛入懷遠縣城突起占踞城上徧插苗練旗幟安設礮位公然背叛並分黨進徧蒙城圍攻壽州情形甚爲緊急伏思苗逆蓄謀數年各圩練眾聽其驅使積儲糧食甚爲充足此次四路舉事較之從前勢更鴟張若不厚集兵力迅圖撲滅恐其勾結髮逆蔓延愈廣爲患不可勝言臣見在馳回臨淮調集各軍相機堵剿可否請旨飭令僧格林沁移軍南下會合皖軍四面兜剿以期永除巨患至懷遠縣知縣英俊雖未聞警先逃而於逆匪踞城漫無覺察實難辭咎應請卽行革職署鳳臺縣知縣蔡鏐事前旣不知防範事後又擅離職守應請革職永不敘用以示懲儆

其張建猷鄒長青苗憬開苗添罄苗希年童維翰袁有功張士端
張誠心王金奎金汝霖苗長春等十二名皆係苗逆黨與從前歷
保官階應請飭下吏兵二部查明一併革職儻能悔過自新擒斬
苗逆再行懇請恩施准予開復懷遠縣典史魏文潮力竭被戕慘
罹鋒刃應請照例議卹 上諭前據倡格林沁唐訓方奏稱自擒
獲逆首張落刑等蒙亳等處地方肅清被脅各圩悉皆歸正並稱
苗沛霖面稟唐訓方訂期散練歸農當以皖北地方被捻髮各匪
蹂躪十年小民流離失所因降旨蠲免錢糧二年並飭地方督撫
招集流亡以資生聚庶幾出吾民於水火之中而登之衽席明知
苗沛霖罪在不赦但能散練歸農亦不咎其既往以示寬大之恩
俾吾民不至再罹鋒鏑乃茲據唐訓方奏稱苗沛霖怙惡不悛叛
迹復著襲攻蚌埠水師營盤占踞懷遠圍攻壽州請飭四面兜剿

等語苗沛霖以練總擢至道員復因暗受僞職襲踞壽州革職治罪上年因官軍追剿陳玉城該練畏懾聲威誘擒首逆免其查辦復經僧格林沁開誠相待賞給餉銀該逆稍有人心受此天高地厚之恩自當沒世不忘乃敢因大軍撤退之時煽惑愚眾圖襲營盤占踞城池如此反覆無常梟獍其性實屬覆幬所不容若再稍事姑息何以振綱紀而安閭閻本日已諭僧格林沁由山東統帶馬步馳回安徽進剿並著曾國藩李續宜吳棠唐訓方各撥重兵四面兜剿殲厥渠魁用彰天討懷遠縣知縣英俊雖未聞警先逃而漫無覺察咎實難辭著卽革職署鳳臺縣知縣蔡鐸事前既不
知防範事後又擅離職守著卽革職永不敘用其苗逆黨與張建猷鄒長青苗憬開苗添罄苗希年童維翰袁有功張士端張誠心王金奎金汝霖苗長春等十二名著吏兵二部查明從前所保官

階卽行革職儻能悔過自新擒斬苗逆方准開復懷遠縣典史魏
文潮慘罹鋒刃殊堪憫惻著交部照例議卹苗逆陰鷙殘殺小民
被其偪脅並非甘心附從著唐訓方出示曉諭其新經投誠各圩
如能同心協勦或竭力固守均准擇尤獎勵其被苗逆偪從各圩
深明順逆自拔來歸者亦當妥爲安撫毋令失所儻始終甘心從
逆抗拒官軍者卽著督軍痛勦毋任漏網以示除暴安良至意○
諭議政王軍機大臣等唐訓方奏馳回臨淮調集各軍堵勦苗練
一摺據稱苗逆襲攻蚌埠經參將張得勝迎擊獲勝逆黨麇集懷
遠縣城插旗安礮復分隊進偪蒙城圍攻壽州該逆蓄謀數年練
多餉足此次四路舉事較前勢更鴟張等語苗沛霖心懷叵測反
覆無常朝廷因軍務方殷勉事羈縻早知其不可久恃頃因僧格
林沁督師北來該逆遂以姜台凌投誠被戮等詞搖惑眾志竟敢

襲踞城邑抗拒官軍亟宜聲罪致討以申國憲而除巨患前據僧
格林沁奏調齊礮位進攻淄川蕞爾縣城不難攻拔如相持尙需
時日則淄川一邑似不足牽制大軍該大臣能否將攻取淄川事
宜妥速布置酌畱兵勇交譚廷襄督攻該大臣卽督率馬步各隊
返旆南征卽著酌度機宜權衡緩急迅速辦理該逆屢降屢叛無
端倡亂名不正而言不順部眾攜貳諒僧格林沁軍至蒙毫該逆
黨勢必瓦解土崩如該逆被剿勢窮詭詞求撫僧格林沁當一意
拒絕斷不可爲其所搖致蹈前車之轍李續宜計已行抵皖境著
卽星馳前進與曾國藩妥速籌商由舒六直趨壽州正陽力扼西
南乘勢進剿唐訓方固守臨淮要隘毋令東竄仍飭令馬新貽等
就近曉諭新撫各圩毋爲苗逆所迫脅並將本日發去明發剿辦
苗練諭旨於各處宣示張貼如有殺賊立功擒獻首逆者該王大

臣等卽隨時奏請破格獎勵俾反正者益堅其志而被脅者不至甘心從逆則勦辦自易得手苗沛霖詭譎伎倆見值髮逆擾及皖北或與之暗中勾結或因李世忠撤去幫辦唆令起事均未可知著曾國藩速飭各營員弁嚴密防範仍遵前旨密察李世忠動靜相機辦理苗練赴清淮捆鹽往來絡繹此時苗沛霖公然背叛其捆鹽練眾曾否撤回著吳棠確切查明嚴拏懲辦並檄飭水陸各營及徐宿各軍以備不虞潁亳一帶在在與豫境毗連張之萬毛昶熙務當豫撥勁兵嚴防邊境並飭各該地方官督率兵勇激勵鄉團防勦兼施勿使該練眾得以竄越袁甲三回籍時所帶練勇千名見在是否仍畱陳州何員統帶著張之萬毛昶熙妥籌調撥扼要守禦直隸股匪見雖渡河而東而大順廣等屬伏莽尙多所有恆齡馬隊卽著畱於劉長佑軍營按捕餘匪如察看沿河各要

隘布置已定卽飭恆齡等督帶所部渡河會同東省各軍剿除竄匪譚廷襄亦當嚴飭保德等併力兜剿毋再觀望遷延致干重咎其劉長佑所調李明惠等統帶之後起各勇並著該督飛催來直以資調遣僧格林沁所部馬隊本不甚多此次攻剿苗練必須厚集兵力著該大臣卽飭蘇克金一軍迅速折回蒙亳以便調遣壽州米糧軍火均極絀乏唐訓方署理撫篆責無旁貸並著設法運解以濟急需唐訓方摺著鈔給僧格林沁張之萬吳棠閱看將此由六百里各諭令知之○諭前據閩敬銘奏起程赴東當經諭令迅速赴任復據毛鴻賓奏臬司丁寶楨募足勇丁千名由水路前赴湖北改由陸路赴東此時諒均已起程在道矣山東捻教各匪疊次肆擾淄川縣城爲團匪劉德培等所踞而東昌降匪復嘯聚直隸山東交界處所肆意焚掠軍務處處喫緊僧格林沁督率北

上勅辦正當得手而苗沛霖於該大臣離皖之後又復糾眾占踞懷遠縣城公然分道犯順不得不令僧格林沁權其緩急移師南下惟山東軍務緊要該省既無得力之兵又無知兵之將譚廷襄交卸在邇尤恐呼應不靈閻敬銘簡署山東巡撫日久尙未到任該省設有疏虞大局何堪設想著懷遵疊次諭旨兼程前進接印任事將一應事宜趕緊布置妥協迅速馳奏先慰廬念丁寶楨所募勇丁定能得力前已據報啟行著卽星速馳抵東境遇賊卽擊務將各股匪次第剪滅俾東省早就廓清方爲不負委任將此由六百里諭知閻敬銘並傳諭丁寶楨知之○諭穆騰阿等奏旗營官兵自上年月餉不繼餓殍相望請旨迅飭瑛棨速籌接濟等語西安旗營兵丁缺餉日久因飢殞命者不下二千餘人覽穆騰阿所奏情形寶堪矜惻見在省城防守緊要豈忍令荷戈殺賊之人

飢餓垂斃至於此極著瑛榮恪遵疊次諭旨督同司道等迅速籌款源源接濟務令士飽馬騰不得再有遲誤致干重咎至回匪詭詐百出一經官軍剿辦每以卑詞乞撫冀緩我師瑛榮從前曾有不可主撫之議此時回氛方熾省城糧運未通瑛榮擁兵不爲不厚務當督飭將士認真剿賊疏通糧道不得株守省垣一籌莫展妄冀回民就撫而以回弁等爲腹心致蹈滇南覆轍也將此由六百里諭令知之○諭明緒奏塔爾巴哈台回民間陝甘回匪滋事疑懼謀亂經明緒傳令回民掌教石金斗等明白開導該回民均各遵服照舊安業各等語新疆地方回種極多明緒於釁端初生卽能設法解散消患未形辦理甚是掌教回子石金斗鄉約陳生福海玉珍等勸導出力著照明緒所擬分別給與頂帶以示獎勵嗣後仍著該大臣不動聲色彈壓撫綏毋稍疏忽前因陝回構釁

往往時造洗回謠言冀煽同類曾明降諭旨令帶兵官及地方文武務分良莠不分漢回於抗拒滋事者盡法剿滅安分守業者妥爲保護以示一視同仁至意西域萬里恐尙未接奉此旨茲令軍機處鈔錄二分發交常清明緒於伊犁塔爾巴哈台等處刊刻謄黃徧行曉諭以安反側將此各諭令知之○己卯諭議政王軍機大臣等張亮基奏督師擊退遵義桐梓等縣各匪並出示免抽釐穀一摺另片奏飭令田興恕前赴四川聽候查辦等語貴州民氣彫敝已極而吏治亦甚廢弛各軍營將士奮勇打仗者雖不乏人而黃白號匪及苗教各匪總未能剋日殲除張亮基接署撫篆急應振刷精神力圖整頓著卽飭沈宏富等迅將螺螄堰逆匪各營掃除淨盡激勵帶兵員弁次第將上下游踞匪一律削平以期綏靖巖疆永除後患屬吏中材能出眾惻愍無華者自當隨時保奏

如有貪劣不職各員卽著據實嚴參以肅官常而甦民困至黔省庫欸蕩然而兵練嗷嗷待哺若將各屬應派兵糧釐穀等欸概行豁免轉恐軍需無出而接括太甚又恐民力不支惟在該署撫慎選良吏輔以公正紳耆妥爲抽收無苛派抑勒之弊庶剿賊撫民兩有神益至道員張心培謝葆齡冷超儒錢登選被劾各欸與殺害教民之案兩不相涉自應分別查辦著卽查拏張心培謝葆齡到案提集趙畏三冷超儒錢登選等將以前被參各欸蹟逐一審訊並將教民呈訴之開州青崖兩案提集戴鹿芝趙畏三等秉公審訊勞崇光由川赴黔計日可到張亮基先行審有頭緒一俟勞崇光抵省卽迅速會商奏結俾免教民曉瀆據張亮基奏田興恕卽日遵旨赴川想沿途不敢逗遛著駱秉章於到省時飭屬妥爲約束靜候查辦雲南省城漢回情形著駱秉章張亮基就近偵探

隨時奏聞將此由六百里各諭令知之○諭張凱嵩奏貴縣各軍進偏登龍橋剿賊獲勝並慎重邊防嚴遏石逆竄越各摺片貴縣黃逆阻險負隅日久稽誅自劉坤一啟行後沿途偵探確實分兵縱擊進偏登龍橋賊巢殺賊無算亟宜乘此聲威力圖掃蕩惟賊眾且悍黨與甚多黃逆被剿勢蹙必將糾約逆黨拌死來援著張凱嵩飭令劉坤一嚴督調派各員弁先將盤踞龍巖嶺底各股匪剋期殲除斷賊援應方可以全力剿賊老巢不至有牽掣之虞駐紮荔浦各軍卽著催調到營與各軍會剿以厚兵力石逆分股竄擾黔蜀之間餘黨復擾及歸化貞豐一帶與廣西泗城府之西隆州邊境毗連著張凱嵩嚴飭該府州會同營弁督飭紳團於黔蜀交界先事布置確探嚴防俾免竄越以固邊圉將此由五百里諭令知之○庚辰曾國藩彭玉麟楊岳斌奏蕪湖金柱關水陸各營

自去秋以來戰爭不休迨十一月閒侍逆糾悍賊數萬人礮船數百號突出東壩將犯金柱關分竄蕪湖曾國荃派武明良一營馳紮東梁山朱洪章兩營馳紮龍山橋以爲聲援三月初八及十三十五等日金柱關守將羅逢元朱南桂截賊於花津上駟渡萬頃湖疊有斬擒十七日賊之由陸路來者右至魚壩左至太平府由水路來者已由三汊河環偏我營朱南桂等督軍出擊焚燒四船賊始奔北二十日賊復犯三汊河營寨並用飛划登岸勢更洶湧朱南桂等率隊搏戰追及河干萬化林等水營乘勢奪船數十號斃賊千計水陸各營以該逆屢來西岸未得一逞不若我軍東渡擊之二十六日夜朱南桂等整旅渡河分道疾進朱南桂令謝大洲先赴上駟渡以截青山後路而自領所部進次卿家橋有一卡梗道我軍猝不得前忽水師萬化林等已自下游飛槳而來面面

環擊朱南桂卽飭潘泗知等躍入卡內駢戮無遺羅逢元一枝正
攻涂家渡二壘未下適朱洪章從青山鈔來武明良亦帶隊趕至
環壘奮擊賊無一得脫者其西岸一卡一壘亦卽攻破自有此捷
賊兩月踰伏不出意謂防務可以少休不料賊之窺伺愈深蓄計
愈狡乃繞竄梅塘觜以上在新圩角搶渡朱洪章輕騎馳往一擊
敗之羅逢元派兵伏於花津之下而與朱南桂進次薛鎮賊堅守
不出各隊繞壘而攻水師以巨礮傍隄轟擊賊棄壘竄至花津半
爲伏軍所殺遂由新圩角來撲朱洪章整軍出鬪不期另股由萬
頃湖渡過鈔我卡後朱洪章撤隊急退已層層包裹朱南桂帶隊
馳援重圍始解而弁勇已多損折賊猶疾如風雨猛撲不休朱南
桂派彭維祥堵河邊一路向世驥堵陶家灣一路仍自帶親兵衝
入查家橋街中苦戰逾時羅逢元等分路截擊乃能轉敗爲勝羅

逢元等復密約蕪湖防兵周萬倬等水師乘賊屢挫其籌再舉分
路並進行至萬頃湖邊見浮橋一道環列賊壘十五座賊卡賊棚
延亘十餘里羅逢元等督隊過橋直搏賊壘周萬倬等沿河繞擊
彭楚漢等復縱焚賊棚爭拔地鍼蟻附而上悉破卡壘按剿至上
駟渡以歸賊以小股排列梅塘觜查家灣對岸而以大股由新圩
角過河專撲朱洪章營卡時李祥和來自金陵率師助防新圩角
甫至該處有長勝營守卡哨勇先經挫退李祥和與吉振各營悉
力堵禦且戰且走退保老營羅逢元等聞警一面飛商彭楚漢等
水師來援一面自簡精銳倍道進發羅逢元由陸公壩繞河而上
朱南桂朱寬義由霍木山前進行未數里彌望皆賊遂分四路衝
入賊乃大潰我軍追至新圩南河邊水師彭楚漢等亦自梅塘觜
追賊而至一鼓蕩洗餘賊盡溺於河先是周萬倬吳坤修兩軍剿

賊於南新圩等處進踞四壘該處近偪蕪湖不能專恃陸師乃令任星元等移師船於清水河爲之倚護正月二十三日賊竄至三里埂循河而下距蕪湖不遠任星元等泝流迎擊王三錫登隄督戰右脅中槍仍揮兵衝突將賊擊退二月初四日灣沚踞賊將犯清水河萬化林等乘夜駛船潛往方然礮轟發適霆營新破西河之賊派船從清弋江下駛合力猛攻更於晨霧中分水勇爲旱隊在街口積薪焚之賊不及防急遽無措出巢紛竄我軍遂收復灣沚一隘旋值河水漲溢萬化林等進攻三里橋賊壘朱洪章等亦率陸軍來會賊焚壘宵遁退併黃池石壘之下該逆自恃岸峻壘堅列礮以待任星元等奮力仰轟左光培登岸與水面戰船摩壘夾擊各賊驚潰我軍立復黃池鍾平石壘朱南桂等陸師會約彭楚漢等水營亦於次日進破伏龍橋護駕墩花津賊巢擒斬甚夥

羣賊遁往金寶圩溧水丹陽一帶臣等查蕪湖金柱關兩城隘爲江界要衝又爲金陵各營後路上年賊蹤環伺諸將士五旬苦戰幸獲保全今又屢卻逆氛連克灣沚黃池以通甯國蕪湖之氣實屬始終不懈所有陣亡各員弁另開清單請卹在事出力人員可否彙入前次案內查明奏保以資鼓勵出自 聖恩 上諭內閣此次水陸各軍在蕪湖金柱關一帶累月苦戰攻克三里埂黃池伏龍橋護駕墩花津各要隘擒斬甚多在事出力員弁著曾國藩等彙案保奏以示鼓勵○諭議政王軍機大臣等張之萬毛昶熙奏苗逆舉兵背叛戕官踞城請飭僧格林沁回軍剿洗並鈔錄偽示呈覽一摺前因苗沛霖叛逆顯著業經明降諭旨聲罪致討令僧格林沁酌度機宜回軍蒙亳迅速剿辦並令張之萬毛昶熙嚴防邊境本日據張之萬等奏稱豫省邊防緊要各兵不敷調撥請

飭僧格林沁回軍由歸陳一帶痛加剿洗卽著該大臣酌量緩急應由何路進兵務須先其所急力掃兇鋒不爲遙制壽州穎上等處是否已被占踞地方官被戕如何情形未據唐訓方奏及著該署撫詳細查明具奏並著懍遵前旨固守臨淮要隘聯絡新撫各圩俾知感奮出力以孤苗黨之勢仍須保固完善以待大軍會剿不得任其蠶食肆意滋擾張之萬已添募馬步兵勇並抽調數營進紮太和歸德如有緩急卽須派隊策應毛昶熙務須親赴歸陳將該處地方團練認真整頓若任令該逆竄入豫疆定惟張之萬毛昶熙是問潼關協副將黃鳴鐸前在署壽春鎮任內固守壽州與苗練爲仇苗沛霖入壽城時將該員執去割耳薙髮凌虐備至曾經諭令勝保查辦嗣據勝保奏黃鳴鐸並未被害亦未言其見在何處該副將向來打仗頗能得力且與苗練向爲仇敵必能不

避艱險力圖滅賊著僧格林沁唐訓方確切查明黃鳴鐸是否被害見在何處據實奏聞候旨簡用如實已爲苗沛霖所殺亦當查明具奏請賜卹以作忠義之氣張之萬等摺著鈔給僧格林沁唐訓方閱看又片奏請將袁保恆調營差遣等語著照所請卽飭該員統率舊部赴營助剿如陳州一帶有警卽令該員在本籍督團堵禦以資得力該撫卽酌量調度將此由六百里各諭令知之○曾國藩奏近日軍情金陵雨花臺一軍撥彭毓橘北援後兵力稍單守局尙穩金柱關蕪湖甯國等處距賊漸遠防務大鬆徽州三面皆賊臣僅畱唐義訓一軍防守徽休兩城十分單薄幸賴左宗棠派劉典王沐各營在長林梅嶺巖寺草市等處疊次苦戰獲勝沈葆楨所派王文瑞亦於漁亭七里橋等處連戰皆捷徽休祁門各城或可無虞然賊思假道徽境內犯江西其謀未嘗一日息也

其嶺外石埭太平等處又有古賴劉藍各股與嶺內黟祁北面之賊接連一片縱橫蹂躪臣飭朱品隆由青陽進攻石埭冀擊動徽賊之後路三月二十二日大戰獲勝仍以賊多兵寡未敢輕離青陽之本防深入石埭之重地鮑超渡河北援之師三月十六日始抵無爲州正欲進剿石澗埠十七日蕭慶衍彭毓橘會合水師由黃落河進兵並約被圍之毛有銘劉連捷等由內擊出大破賊壘賊卡立解石澗埠之圍鮑超聞重圍已解登舟仍回上游欲再踐赴援江西之約臣聞賊大股並未退回巢縣悉銳上竄直撲廬江乃飛檄鮑超急登北岸往援忠逆於十九日攻撲廬江縣城守將梁美材等登陴堅守伺隙出擊擒斬甚眾賊由界河迤邐而北分竄舒城桐城一帶其由鄂東竄之捻逆在蘄水分兩股一竄黃州一竄皖境十八日攻宿松旋越太湖潛山撲桐城遂入孔城鎮與

廬江髮逆聯成一片據接獲忠逆僞文將由舒城六安上竄英霍
麻林宋埠一出黃州一出漢口擾犯湖北意欲掣我南岸之兵以
援北掣我下游之兵以援上無非圖解金陵之圍臣以該逆規畫
甚大蓄謀甚狡湖北爲數省樞紐不可稍有疏失飛咨官文嚴樹
森調成大吉回駐瀟口撥水師速赴武漢聞李續宜於三月初十
日自湘啟程擬俟其道出鄂疆卽咨令暫駐黃州會籌鄂皖大局
當此南北喫緊苗練復大露叛迹惟有酌量緩急相機調派以維
大局上諭逆賊欲解金陵之圍分黨由徽甯窺伺江西由和含
一帶圖犯湖北疊經官文嚴樹森左宗棠沈葆楨等奏聞江省饒
信兩防守備尙嚴與左宗棠派往皖南之劉典等軍聲勢聯絡賊
不得逞而逆謀竄江之意迄未少息和含一帶賊眾游弋已久勢
必欲越皖境上犯鄂疆又有由豫竄鄂之捻股可分黨下竄以應

之茲據曾國藩奏巢縣大股竄撲廬江由界河分竄桐舒其由鄂東竄捻股已自蘄水分爲兩股一股回竄黃州一股竄皖攻撲宿松越潛大以撲桐城廬江桐城守將雖均能嚴備出擊各有斬擒而桐舒捻逆勢已聯成一片並接獲忠逆僞文有將由舒六而竄英霍分道擾犯鄂境等情誠如曾國藩所奏逆謀甚狡而規畫甚大總欲圖解金陵之圍此時曾國荃雨花臺之軍自不得輒自移動墮賊詭謀湖北爲數省樞紐誠不可以稍有疏失前諭官文嚴樹森飭令舒保成大吉等軍將捻股痛加遏剿豫截豫捻與皖省逆匪勾結之路嚴樹森已出駐團風親督各軍分投布置當不至任賊竄入肆其猖獗著卽迅籌堵剿李續宜已自湘啟行道出鄂疆自可與嚴樹森面爲商酌皖鄂兩省堵剿機宜惟苗練叛迹復著已據正陽圍攻壽州李續宜亟應趕緊赴皖迅圖剿辦唐訓方

資望稍淺且恐未能面面兼顧所請飭令僧格林沁回軍剿苗雖已諭令該大臣酌量進止而僧格林沁見在圍攻淄川踞賊東省羣匪方資鎮壓卽直隸邊界之賊甫經劉長佑擊剿渡河回竄直東接壤防剿綦嚴北路情形均望僧格林沁之軍掃蕩其能否回軍皖省尙未可知李續宜到鄂與嚴樹森商定一切著卽仍遵疊次諭旨兼程赴皖石埠橋雖已解圍巢含大股賊氛正肆鮑超之軍仍應在北岸相機擊剿當此羣醜蓄謀紛竄皖鄂曾國藩所督各路之軍幾有應接不暇之勢該大臣素能鎮定惟當毅力精心以圖萬全浙滬兩軍事機尙順節據左宗棠李鴻章各奏進攻富陽及崑山均可得手著該督撫卽嚴督各軍迅速進取左宗棠以杭城不難卽克而難於杜賊紛竄是以不急旦夕之效固屬老謀此時賊旣分投北岸及長江上游圖解金陵之圍浙滬兩軍如能

一克富陽以取杭州一克崑山以取蘇郡則金陵之賊腹背受敵或即可收擣穴擒渠之效諒該大臣督撫等必能因時審勢以赴事機也將此由六百里各諭令知之○諭多隆阿奏攻破龐谷莊等處回巢並雷正綰攻剿永樂店情形各摺片逆匪於龐谷莊沙窩雷化喬千等處挑挖長濠綿亙三十餘里並於東北西三面設立重濠木城拒守甚堅經多隆阿督率諸軍移營進逼搶上沙包先將雷化鎮攻克破其長濠並將龐谷莊喬千兩處續行攻拔卽於長濠內紮營八座以防逆匪復行來占辦理尙爲得手該大臣病尙未愈卽親往前敵力卽攻克賊巢數處實屬奮勇著卽乘此聲威將孝義鎮速行攻破以期直擣倉頭埽除逆黨毋稍遷延雷正綰進攻永樂店老巢未能得手僅殲斃賊匪數十名該匪分股在涇陽純化三原耀州等屬地方盤踞滋擾冀斷官軍糧道必須

分軍四出力行埽蕩以靖逆氛著雷正綰督率兵勇實力剿除毋得株守一隅致成坐困將此由六百里各諭令知之○以安徽治理需人命吏部本科多掣知縣十六員分發差委○飭山西撥抵河南協甘餉銀○予江南陣亡遊擊美固國陝西陣亡參將何成江祭葬世職○辛巳追予浙江殉難學政刑部右侍郎張錫庚祭葬世職如尙書例入祀昭忠祠○以浙江錢塘知縣袁忠清從賊命嚴訊正法○壬午諭議政王軍機大臣等劉長佑奏匪眾東渡剿河又圖北竄督兵防剿一摺河東股匪被直隸官兵追剿窮蹙不敢遁回莘冠等處老巢由東昌府七集村偷渡剿河擾及茌平地方復竄至高唐州迤北之朱家莊一帶該逆避兵而行是其慣技此次因恩縣德州等處防守空虛徑欲乘隙北竄該督已檄調李同文督率該管地方官厚集團練扼要堵截並飭熱河古北口

官兵一千名馳赴景州匪眾若一路北竄該處正當其衝卽著嚴飭該道員嚴扼運河西面賊至迎頭截擊以遏竄越儻有疏縱情事卽惟該道員是問恆齡蘇克金業已渡河卽著催令繞出賊前會同譚廷襄派出各軍實力兜剿徐廷楷余承恩等亦著飭令各率所部折回東北覘賊所向悉力截擊務須四路兜拏杜其回竄莘冠等處伏莽尙多河防仍關緊要著飭王榕吉嚴密扼堵毋稍疏懈劉長佑奏閻敬銘函致該督三月十三日由晉省啟行計程當在景德之交而張錫珠股匪見由東昌偷渡剿河在荏平楚掠距德州景州不遠德州民團陳冠甲據劉長佑奏稱聞其志切同仇最爲齊整卽著閻敬銘就近訪聞如實在可用卽行飭調迎剿以資得力正在寄諭聞據閻敬銘奏行抵阜城探悉東南兩路見皆不通設法繞路前進各摺片著卽探明路徑馳赴軍營接印任

事僧格林沁見派施紹恆帶勇赴皖剿辦苗練該大臣尙在淄川
攻剿踞匪能否卽赴蒙亳著俟閫敬銘抵任後與該大臣妥籌會
商斟酌辦理將此由六百里各諭令知之○僧格林沁國瑞奏查
淄川逆匪於三月二十五日傍晚趁我軍撤隊時擁眾撲出經翼
長舒通額等奮力回擊計斃馬步悍賊二百餘名詎該逆於夜閒
復潛行出城攻撲青州滿兵營盤協領恆祥等督兵固守擊斃匪
眾百餘名賊始退去二十六日臣等移紮距城九里之張家坡二
十七日調到礮位連日督隊進攻一面挑挖環濠該逆每日出撲
皆被馬步官兵擊回惟據投誠之人供稱見在擒匪李輩兒張守
義等恐環濠挖成難以出竄欲乘未經合圍之時衝出逃遁因每
夜派馬隊前往近城一帶哨探四月初二日夜閒據守備桂錫楨
稟報該逆馬步突出南門向東南奔竄並據拏獲擒匪供稱擒匪

受傷不能行走甯於城內者約三四百名其餘全行逃竄劉德培
所帶黨眾仍在城內盤踞未動等語當飭翼長舒通額已革副都
統德楞額等帶領馬隊一千數百名跟蹤追剿臣等僅畱吉林馬
隊三百餘名仍督飭各營挑濠安營以期及早蕝事其直隸股匪
疊據提督恆齡稟報自到直東數獲勝仗敗殘餘匪見已南竄剿
辦尙稱得力其東昌地面冠館莘堂等屬已無股匪見在譚廷襄
已到淄川督催所派兵勇會同臣等商酌攻剿事宜此時直隸已
無大股之賊其竄過河南餘匪見有恆齡成保馬隊追剿又有蘇
克金一軍由衛輝探蹤前進與督臣劉長佑會於尖莊兵力足敷
剿辦臣等俟淄川克復卽當移軍進剿鄒縣之白蓮池教匪該逆
盤踞山中地面寬廣必須厚集兵力屆時東昌一帶賊匪無多擬
仍畱恆齡馬隊與成保之軍會合接捕蘇克金一軍卽調赴鄒縣

助勦至唐訓方所奏苗練叛逆復著恭奉諭旨飭臣僧格林沁通籌熟計設法援應查苗沛霖心懷叵測原在意中本擬俟勦滅各股擒匪後以兵力制之柰因直東股匪鴟張不能不暫示羈縻先顧北路茲該逆叛迹昭著若督兵馳回恐直東匪眾聞風思逞餘燄復張見據馬新貽等稟報苗沛霖業已先後占踞潁上懷遠鳳臺三縣又復帶領黨眾近逼蒙城情形喫緊請兵往勦等語見在直東軍務未靖難以撥兵南下再四籌畫已飭都司施紹恆帶領投誠勇一千名由鄒縣速赴蒙城交馬新貽差遣以資進勦上諭淄川踞匪與捻逆句合後經僧格林沁督軍攻勦捻逆乘隙南竄逆首劉德培之勢已孤而官軍所調礮位已到諒可指日攻拔南竄捻匪見竄何處舒通額等督軍追勦已否追及著僧格林沁將淄川踞匪迅速攻克並嚴飭舒通額等將竄匪趕緊追勦毋任

遠竄以致重煩兵力直南股匪見雖回竄河東而東昌各屬伏莽
尙多譚廷襄止知敷衍目前遽謂已無股匪殊不可信且該匪因
劉長佑馳赴臨清卽折由茌平等處北竄著卽飭蘇克金恆齡等
會同直隸官軍繞前夾擊以期殲除淨盡見在閻敬銘將次抵東
臬司丁寶楨由楚募勇千名赴任已催令迅速前進該署撫等雖
情形未能熟悉而素來辦事尙稱結實著該大臣於閻敬銘到東
後或令前赴東昌按捕餘匪令丁寶楨赴鄒縣統帶官軍剿辦敎
匪該大臣仍遵前旨馳赴蒙亳剿辦苗逆卽著豫籌辦理本日據
袁甲三奏苗逆非占踞長淮以專鹽米之利恐上據壽正下據臨
鳳北窺徐州西窺陳汝莫若乘此初起飭令僧格林沁回軍直搗
懷蒙爲扼吭拊背之勢等語該大臣甫由皖回東已屬勞瘁而觸
熱南征尤廛於懷第恐逆練之羽翼一成爲患滋大事機所值深

慮皖省兵力不能迅速奏功仍著該大臣酌量緩急妥籌辦理都司施紹恆所帶投誠勇一千名諒已起程卽著迅催前進施紹恆可卽作爲該大臣前隊解散苗練脅從告示及擒獻苗沛霖賞格該大臣卽可迅速刊刻交其帶往張貼庶良團之心有所恃不爲苗沛霖所脅更可冀有人割取其首級以獻一如前此辦理李城等故事該大臣聲威素著人望所屬儻能設計除之亦可不煩兵力所請派員督辦直東豫交界軍務一摺不爲無見著暫行畱中備覽以便妥議施行將此由六百里諭令知之○諭前因苗沛霖叛逆復著疊諭僧格林沁回軍剿辦並諭張之萬唐訓方派兵分剿茲據袁甲三奏稱苗練復叛請飭僧格林沁等進剿等語自係未悉見在辦理情形苗沛霖蓄志叛逆已非一日而從前調援京師調赴陝西均不肯往本係自守之賊未肯遠離巢穴第恐蒙穎

等處爲所占踞則西窺陳汝亦在意計之中惟僧格林沁因東匪牽掣尙難統軍南征本日奏稱派都司施紹恆管帶投誠勇一千名前往交馬新貽差遣尙恐未能得力張之萬已撥兵前赴太和歸德一帶是否足資堵截而陳州爲太和後路袁甲三見雖告病回籍著卽會商該處紳耆激勵團練昨諭毛昶熙如探有警信卽行馳赴陳州諒袁甲三等以本地紳士必能稍收成效俟毛昶熙赴陳更可會同妥籌辦理袁保恆已准張之萬調赴軍營如陳州團練分辨無人袁保恆卽著毋庸前赴汝甯軍營唐訓方身權撫篆於苗逆一事責無旁貸僧格林沁卽能返旆南征亦恐尙需時日著恪遵前旨相機辦理毋得專待援師致誤事機袁甲三所奏分遣游兵一西巡光固以斷淮南上犯之路一東巡歸德以斷永夏西趨之路自係扼要之策並據稱以剿辦汝匪專委毛昶熙而

張之萬親赴東北一帶適中駐紮以便調度各等語著張之萬毛昶熙酌量情形豫行籌辦其駐潁之蔣凝學一軍並著唐訓方安籌調度以資攻剿將此由六百里各諭令知之○諭官文嚴樹森奏官軍剿辦捻逆情形及抽派郎中李雲麟率師援陝各一摺捻逆竄擾鄂境經嚴樹森馳紮團風鎮調派各軍分路擊剿先後在望花東界嶺及游河鶯粟子灣等處獲勝頗有斬擒而該逆東奔西突總未大受懲創昨據曾國藩奏鄂東捻匪於蘄水分爲兩股一股回竄黃州一股竄入桐舒與髮逆聯合該逆黨與雖眾業已分股下竄其在鄂境游弋者勢猷諒已稍衰亟應乘勢剿滅著該大臣等嚴飭各營將弁併力兜剿務將此股竄匪就地殲除毋得觀望遷延致干重咎陝南郡縣匪徒麇聚若不迅圖剿滅不獨西安省垣可慮卽川楚邊陲亦無安謐之日官文等見飭李雲麟率

所部三千餘人由鄖陽渡漢而南著卽飭令該員剋期進剿漢中待援孔亟毋得駐守興安城內致誤事機前因漢南軍情緊急節經諭令駱秉章檄調周達武督軍援剿見在賊氛甚熾恐非李雲麟一軍所能殄滅駱秉章自當力顧大局仍遵前旨速飭周達武星夜馳援與李雲麟兩路夾攻俾收聚殲之效如周達武一時不能赴陝卽著藩司劉蓉出省督率勁旅踰劍閣而北與鄂軍會合攻擊之處由該督酌量迅速辦理李雲麟師至漢中去楚較遠所有該營軍餉等項並著駱秉章隨時協濟就近由夔關稅課項下撥給俾免飢潰仍著官文嚴樹森飭屬設法轉輸源源接濟毋得以道遠難至爲辭稍涉推諉將此由六百里各諭令知之○諭多隆阿奏官軍攻破孝義回巢大獲全勝一摺陝省東路回巢林立經多隆阿督軍剿辦連破龐谷莊等處堅巢此次迎剿西路援匪

大獲全勝乘勢攻拔孝義鎮並平毀附近小村七八處軍威大振
破竹之勢已成倉頭老巢拒守雖嚴想不難指顧掃蕩該大臣自
入陝後所向克捷調度有方倉頭之克計在旦夕尤當慎益加慎
不可屢勝而驕西路援賊經此鉅創其膽已寒一俟東路肅清卽
可鼓行而西節節剿洗想該大臣必能斟酌辦理也將此由五百
里諭令知之○諭晏端書等奏高州一帶軍務及剿辦廣海客匪
情形一摺高州軍興日久卓興方耀兩軍苦戰數年迄無成效廣
西容縣逆匪范亞音一股又與該逆互相勾結若再遷延疲玩必
致勢成蔓延愈難撲滅前已有旨令崑壽前往督辦卽著該提督
統率卓興等審度機宜實力勦辦並將所部各營裁汰老弱簡練
精銳以期壁壘一新迅速肅事其陽江一帶匪蹤出沒無常並著
嚴飭遊擊賴建猷等認真防範斷其紛竄之路總之以本省之兵

辦本省之賊果能信賞必罰寬備餉需無不可速了之理正不得專待客兵也江忠義雖由湖南拔隊前赴廣西而皖南髮逆猖獗亦待此軍防剿晏端書等鼓勵各營兵勇乘銳進攻不得專待援軍致滋貽誤至廣海客匪踞城拒守甘心叛逆實屬罪不容誅吳昌壽等見擬滾營進紮先破近城伏匪然後設法圍攻如果該匪悔罪自投仍行分別辦理所籌尙妥惟匪勢已成非創以兵威豈能革心革面晏端書等務當督飭吳昌壽等盡力剿辦不可稍存將就了事之見致誤後患海廷琛添募之勇已否成軍該員前經調赴直隸如剿辦廣海匪徒必須該員前往協助卽著據實奏聞將此由五百里各諭令知之○予山東陣亡頭等侍衛卓明阿等祭葬世職○以吳廷棟爲刑部右侍郎

由大理寺卿遷

○癸未諭內閣前

因浙江省金嚴甯紹台等府地方均爲賊踞百姓慘遭荼毒曾經

降旨將浙東新復各府州縣均蠲免二年錢漕以蘇民困嗣因衢
州一城雖未失陷而西安縣各鄉亦俱被匪焚掠復降旨將該縣
錢漕照新復州縣一體蠲免茲據左宗棠奏稱同治元年分錢漕
業於咸豐十一年冬閒奉旨豁免所有前奉恩旨請飭遵行等語
浙江被陷地方同治元年分錢漕既已有旨豁免卽著將同治二
年分應徵錢漕一體豁免並著於原降諭旨二年上添註同治二
字以示區別而免牽混該撫其迅卽頒發騰黃徧行曉諭○諭多
隆阿奏官軍攻破倉頭老巢東路同朝一律肅清一摺陝西逆回
竄踞同朝一帶以倉頭鎮爲老巢多隆阿自攻破王閣村羌白鎮
並龐谷莊雷化鎮喬千孝義鎮等處巢穴賊勢日蹙踞伏倉頭鎮
土城內負隅抗拒四月初一初二等日多隆阿督軍移營進逼倉
頭賊穴揮隊縱擊城內賊眾大亂我軍奮勇登城遇賊卽殺餘匪

奪路狂奔復經官軍馬隊追殺二十餘里擒斬甚夥其投渭河溺斃者不計其數當將倉頭鎮攻克東路同朝一律肅清辦理甚屬得手仍著多隆阿督飭將士將敗逃餘匪悉數殲除毋畱餘孽○諭議政王軍機大臣等前因江皖軍情緊要屢命江忠義赴粵之師東行赴皖茲據江忠義奏該營已次第啟行前赴粵西旋接奉赴皖之命見已檄調頭隊五營旋楚一面咨商毛鴻賓籌給餉項卽行就道惟廣東高州賊勢甚熾屢接晏端書函催望援甚切粵東爲完善之區餉源所出亦當力籌保全各等語見在援皖之師既有席寶田周寬世新募各軍諒已可資分布而廣東陳金缸一股蔓延日久若與潯郡各匪勾結一氣必爲兩粵巨患江忠義所部頭隊五營此時計已前抵桂林若再檄調回楚不特爲期迂緩無補皖事之急且以得力勁旅僕僕道途亦屬非計江忠義著毋

庸赴皖卽日率領各營前赴粵省酌量賊勢輕重先其所急相機
勦辦其軍行口糧並著毛鴻賓迅速籌款接濟毋令缺乏致滯師
期至席寶田一軍見在行抵何處並著曾國藩毛鴻賓催令刻日
遄行應由何路進取覘賊所向實力迎勦之處著曾國藩相機調
遣湖南見在四境無警其駐守省垣之趙煥聯一軍及總兵王永
章等臬司陳士杰知府戈鑑所部各營何員可以調令援皖著曾
國藩與毛鴻賓隨時咨商迅速辦理毋誤事機將此由六百里各
諭令知之○左宗棠奏富陽踞逆經水師副將楊政謨等擊敗後
伏匿城中於西門安設大礮援賊復在城東北之新橋屯踞蔣益
澧由南岸渡江飭高連陞等軍進駐新橋偏之築壘未竟援賊分
股來撲官軍開礮轟斃數十人賊卽退回據生擒賊供僞天將謝
逆僞朝將汪逆飭主將汪逆於杭嘉等處挑選悍黨四萬餘已至

新橋左右僞聽王擁眾續至以圖抗拒溫處道魏喻義會同總兵劉清亮偪圍富陽縣城二十四日蔣益澧移紮新橋飭高連陞等分兩路齊進該逆先撲左路熊建益大呼陷陣王聯芳等由田隴橫截而出賊甫敗走後隊之賊又進熊建益等奮力衝殺賊始奔敗陣斬悍賊四五百名當左路酣戰之時賊分兩大支撲犯中右兩路蔣益澧令徐文秀等偃旗設伏飭周廷瑞等佯敗誘之賊至復發斬馘無數賊遂併歸右路高連陞揮軍迎敵斃騎馬賊目數名大旗悍賊數十名賊眾敗走官軍乘勢猛追賊復分股鈔襲王宗元衝入賊中手刃數賊中槍陣亡張志公亦身被數創正相持間蔣益澧率親兵馳至高連陞等復挺矛回鬪立斃悍賊百餘名賊始大潰官軍齊隊跟追被戮者不下六百餘名其富陽城中踞逆見官軍進剿援賊突出二千餘人徑撲西門營壘曹魁甲等從

旁鈔殺斃賊數十名賊敗過石橋副將楊政謨等率戰船排礮轟之又斃賊無算查此股援賊均係首逆李秀城之黨勢頗兇悍經蔣益澧等此次痛擊逆酋稍衰惟地方遼濶又值陰雨兼旬難以趣戰當飭諸軍相機圖之至富陽以下潮汐甚大三板不能壓潮見製長龍戰船並調甯波水師布興有等艇船及甯紹台道史致諤雇募白鼈殼船十二號駛進錢塘江助剿其新城縣城已飭遊擊賴錫光等帶營駐守桐廬縣城以知縣楊鼎勳帶營駐守以通餉運而壯後路力戰陣亡之守備王宗元應請旨交部從優照遊擊例議卹又奏臬司劉典一軍調回嚴州後臣卽飭其馳赴皖南行抵長溪適接徽防總兵唐義訓等函稱賊已逼近徽城由巖寺街上至萬安街北至許村南至東關賊蹤密布並據生擒賊供僞金王鍾逆僞東平王何逆及僞梁王等踞潛口僞主將賴逆踞巖

寺街僞襄王劉官方及僞哮王濂王等踞長林萬安街等處眾約十餘萬劉典以賊未知我軍突至利在速攻卽日分營進紮梅林以防賊由休甯南路繞竄並約唐義訓王沐剋期會剿次日飭黃少春攻長林劉典率中營從萬安街接剿而下賊覩浙軍驟至卽大潰退追過河西始結陣回拒另股由山谷中竄出鈔我後路劉典一面分軍截剿一面率親兵從中橫擊賊敗向山路蹂附而遁時黃少春等由右路進攻巖寺街已奪據山梁適王沐馳至併力夾擊約計斃賊近萬生擒三百餘名餘逆退往徽州北踏之許村箸嶺以至藍田一帶而僞金王濂王糾合僞天將鍾王等逆復進踞潛口劉典移營進紮適昏霧四塞大雨如注急令收隊而前隊已至長林猝不及收該逆分三路來撲劉典馳往策應始將隊伍收回是役僅殺賊百餘名而參將張顯榮等均已深入力戰陣亡

三月初一日僞金王鍾逆率黨來撲梅林中路官軍疾起擊之左右兩路由山谷鈔出賊大敗狂奔斃賊數百名初五日鍾逆賴逆又來撲營劉典飭左右兩路乘之追殺十餘里陣斬悍賊數百名初七日黃少春等由東關出潛口之右劉典由長林出潛口之左賊見官軍隔岸遙放槍礮劉典揮軍猛擊賊卽狂竄追過潛口十餘里斬賊數百名生擒數十名見往太平縣竄去劉典已飛飭黃少春等馳赴漁亭與王文瑞等會剿其駐防祁門之道員王文瑞等會同劉典各軍擊敗逆首劉官方等疊勝於漁亭祁門之間臣維各股逆賊麇聚於徽休祁門一帶原圖由此越竄江西見在敗賊多趨黟縣劉典一軍必殲除此股乃無後顧之虞頃據探報甯國有另股賊匪續竄績溪其甯國旌德太平石埭等縣仍爲賊踞劉典擊敗之賊又竄入池州屬之建德縣逆氛漸趨江西景德

鎮之防殊爲喫緊臣前飭王德榜一軍由白沙關速回浮景翼可
稍遏奔竄惟賊數太多浙軍未免爲所牽綴前此劉典赴徽時臣
屬其無分江皖相機援剿如果皖事漸緩浙軍可敷分撥自當星
馳入江共圖埽蕩斷不敢稍事遲延所有陣亡之參將張顯榮守
備左萬明金友成懇請飭部從優議卹沈葆楨奏據道員王文瑞
稟稱三月初五日探聞竄踞建德之僞堵王黃汶金等潛勾石太
賴古各逆合攻祁門該道以西路空虛將漁亭兩營調回繼果營
王沐亦抽隊來助該逆由桃樹嶺過新安嶺次日有騎馬賊數千
冒雨衝至西城根自大白舖等處至離城十里許徧地賊蹤號稱
五六萬該道傳令是夜五更出隊張左右翼分路而進至七里橋
遇賊丁長勝開礮立斃悍賊十餘人賊猶恃眾衝撲丁長勝直搗
中堅熊常富從旁鈔殺賊乃逃竄追近小路口賊大隊回撲弁勇

奮力衝殺殪賊千餘賊困而死鬪者十餘次喻勝榮匹馬當先左手受矛傷馬前足亦被斫斷猶力戰不退百長彭友年身被十餘創血戰而死丁長勝等鼓譟直前適左右兩路橫鈔而至圍而殲之免脫無幾其藏匿山林者亦經鄉團按殺甚夥共計生擒八百六十五名此次各將士以少擊眾疊獲奇捷洵足屏蔽江右厥功甚偉其出力及陣亡員弁應由左宗棠查明辦理又奏僞哮王胡鼎汶等由龍船渡率馬步數千徑犯梅源橋團長程發達等豫伏橋左殺斃百餘名韓進春派隊至陳家嶺遇賊千餘殺斃數十名次日復出隊前進遇哮逆帶賊數千鏖戰兩時殪其前鋒數十哮逆騎馬先遁羣賊遂潰悍賊數萬揚聲撲營前隊及灣里周村一帶韓進春分三路迎敵殺賊甚多後隊援賊踵至併力死鬪我軍少卻韓進春督兵突陣手刃騎賊五名賊遂大敗該逆經此大創

不敢再窺饒郡由洋塘潛出高沙坂一帶漸有東趨之勢王德榜已將浮梁城守事宜安置妥貼建德後河尙有僞愛王一股跟蹤而上其勢寡弱不過數千彭澤都昌鄱陽各團尙能互相聯絡臣惟有嚴飭各軍相機堵剿上諭首逆李秀城之黨自杭嘉糾合醜類援救富陽經藩司蔣益澧等痛加剿洗兇醜稍衰左宗棠見在添造長龍戰船並檄調甯波水師駛進錢塘江助剿著卽嚴飭水陸各軍合力進剿迅拔堅城務將此股悍賊悉數殲除勿畱餘孽其竄擾徽休之賊節經臬司劉典督率兵勇先後在嚴寺街潛口等處迎擊退竄太平黟縣其圖竄祁門之賊亦經道員王文瑞督率丁長勝等以少擊眾疊獲奇捷徽防可期穩固惟各股逆賊麇聚休祁一帶原圖竄越江西見雖擊退而績溪旌德太平石埭等縣尙爲賊踞敗賊復竄回建德饒郡之防殊爲喫緊韓進春率

勇在陳家嶺灣里周村一帶奮勇攻剿賊由洋塘山路東趨尙有
僞愛王一股由建德後河跟蹤而上彭鄱各縣鄉圖雖尙能聯絡
而賊數太多必須厚集兵力方可以埽蕩羣兇著沈葆楨督飭在
防員弁認真堵剿並激勵各屬團勇就近策應以輔官軍所不逮
毋得稍有疏虞饒廣爲浙軍後路關繫緊要此時賊匪分道竄逼
江西王德榜一軍尙恐兵力不厚並著左宗棠妥籌兼顧如皖事
稍鬆卽飭劉典等軍無分畛域隨時相機援剿俾該逆不能竄越
浮景方爲妥善左宗棠另片一件著畱中將此由六百里各諭令
知之○諭本日據多隆阿奏官軍攻破倉頭老巢東路肅清一摺
覽奏欣慰逆回糾眾盤踞同朝一路以倉頭鎮爲老巢多隆阿自
入關後督飭將弁奮力攻剿連克堅巢肅清東路據奏南北兩岸
均可紮營與省城聲氣相通是陝省軍務一大轉機著多隆阿速

將敗殘餘匪按捕淨盡一面率得勝之軍仍遵前旨鼓行而西節節掃蕩或先赴咸陽涇陽一帶駐紮與雷正綰之軍會合或先顧省城將附近各賊巢一律剷除疏通糧道多隆阿身爲統帥責無旁貸卽著通籌全局權其緩急迅籌妥辦不爲遙制甘肅固原失陷平涼被圍靈州甯夏情形喫緊亟盼馬德昭帶兵前往多隆阿如能分兵協助省城卽可令馬德昭帶所部前赴甘省剿洗以免蔓延並著多隆阿酌辦同朝旣經肅清晉防西路似覺稍鬆惟回匪被剿四散仍恐其到處勾結自西而北由綏遠城一帶繞路竄越擾及晉疆牽掣多隆阿大軍後路著英桂仍飭在防文武員弁於晉省西北邊界實力扼堵毋稍疏懈並行知綏遠各城將軍等督率兵弁嚴密遏剿毋令竄逸將此由六百里各諭令知之○追予浙江殉難學政張錫庚諡文貞按察使甯曾綸祭葬世職加等

均入祀杭州昭忠祠副將鄂爾霍巴於湖州建祠○予安徽陣亡
參將張顯榮祭葬世職○甲申唐訓方奏三月二十一日苗逆親
督悍黨萬餘人在蒙城東南迤西搶築營壘直抵河岸計欲斷我
糧道馬新貽以城中米糧軍火缺乏非出死力擊之將有坐以待
斃之勢因令遊擊陳德雄等礮船排布河下白率練眾會督總兵
王才秀徐鵬署知縣賀緒蕃參將李南華等分路齊出該逆亦分
股迎敵鏖戰逾時我軍勇氣百倍李南華率練搶過濠溝立梟守
垓悍賊數十人大兵乘勢薄之逆勢不支棄壘而遁徐鵬王才秀
督率所部盡力窮追其計斬首二千餘級生擒二百餘名就地正
法是役以少勝多足塞賊膽惟兇渠張建猷數壘堅持未下該逆
復添調醜黨開挖長濠欲以持久困我刻下餉需奇絀已飭馬新
貽就地設措激勵兵練竭力守禦並由臣飭總兵張得勝普承堯

等分紮蚌埠進圖懷遠以牽賊勢又據各路稟報該逆叛踞懷遠時分黨踞守潁上署知縣濮煒等遇害並殺署鳳臺縣知縣蔡鏐於下蔡正陽關前係該逆派練駐紮近復大股守之霍邱潁州均與正陽潁上毗連該處府縣兩城同時告警苗黨潘壇復踞三河尖卡壽州仍被圍困忠逆自石澗埠解圍後悉眾以撲舒城當經道員蔣凝學擊退旋犯六安鄂省回竄之捻亦由潛桐趨六安與髮逆合苗逆復乘機勾結並誘惑蒙城新撫捻股遣人密招李城逆黨回巢臣查苗逆恃其糧足練眾公然戕官踞城黨與四出大有併吞長淮之意非僧格林沁速攻其北李續宜速攻其南恐難制其死命見在六安被圍壽州無兵無餉勢難持久蒙城兵力雖暫時勉支而餉源無出終虞生變臣以一軍西圖懷遠東顧清江近扼臨淮屏蔽鳳陽府縣兩城實形竭蹶萬一六安不早解圍致

髮捻苗三逆交乘更將不堪設想幸曾國藩派鮑超追剿廬桐之賊諒能援救六安臣亦函催李續宜督軍會剿至畿輔重地有督臣劉長佑防剿似可無虞仍應請旨飭下僧格林沁移師南來與臣部三面並進庶期殲厥渠魁使不得合謀以逞大局幸甚上諭議政王軍機大臣等見在逆黨分踞潁上殺害該署令濮煒及署鳳臺令蔡鏐復添大隊據守正陽其黨潘塏復踞三河尖卡圍攻六安壽州霍邱潁州同時告警舒六一帶正值髮逆交乘之際苗逆復乘機勾結並出偽示誘惑蒙城新撫捻股遣人密招李城敗黨回巢又有串通李世忠以正陽懷遠易五河縣之信苗逆復行叛亂兇餒驅張見已遣黨四出大有併吞長淮之意其南句髮逆北招捻黨東連降勇誠如唐訓方所奏不可不早爲消弭以致不可收拾僧格林沁見在督軍圍攻淄川踞匪據該大臣奏已遣

施紹恆所帶勇隊千名赴皖此時苗燄驅熾非該大臣親督大軍回軍赴皖斷不足以制其死命著僧格林沁卽由淄川剋日返旆南征與李續宜唐訓方之軍南北夾擊毋誤事機李續宜早已自湘啟行前據曾國藩奏稱該署撫行經鄂省尙須與嚴樹森面籌防剿見在苗逆叛亂事機萬緊李續宜著卽兼程星速赴皖毋得在途遲滯唐訓方所部兵力雖單務須激勵諸軍兼籌戰守督率蒙城壽州文武竭力備禦毋使逆賊得以肆其蠶食施紹恆勇隊到皖應由何路進取著與僧格林沁咨商調度一俟僧格林沁李續宜南北之軍到齊迅卽乘機進搗殲厥渠魁該逆人數雖多半由於迫脅如能迅將一二兇渠死黨剿除元兇授首餘者自可反正歸誠六安地方尤爲緊要髮逆忠酋巨股自石澗埠舒城來犯鮑超一軍見在無爲著曾國藩飭令就近援救與桐城之周寬

世舒城之蔣凝學等軍聯絡擊剿鄂省自蘄水分竄捻股東越潛太著曾國藩迅卽調派各軍分投攔剿毋令併入六安串合髮逆並與苗練句結爲患並著官文嚴樹森督飭鄂省官軍務將由鄂竄皖各股前截後追毋任東趨以鄰爲壑淄川圍剿事宜僧格林沁布置已周閻敬銘昨奏由阜城前進不日當可到營著卽交其督辦譚廷襄見在淄川地方軍務一切均可面爲交代並著閻敬銘星速前往接篆督辦淄川軍務俾僧格林沁得以及早南征毋稍延誤閻敬銘未接篆以前譚廷襄仍須督飭各軍實力剿擊不可鬆勁其白蓮池教匪卽著僧格林沁閻敬銘飭令恩錫督率在事兵練妥籌剿辦並著飛催丁寶楨所帶楚勇星速前來以資倚任蘇克金馬隊畱辦直東股匪自可資其得力惟念僧格林沁南征兵力亦不可不厚此軍或令隨同赴皖或可仍畱直隸著僧格

林沁自爲調度本日已明降諭旨令劉長佑督辦直東豫三省交界剿匪事宜該督見赴臨清所有折由在平等處北竄之賊仍著督飭恆齡等會合直隸各軍兵練繞前夾擊務令賊匪不得喘息卽殄除淨盡以絕根株而杜蔓延王榕吉祝壇均係素嫻軍旅著劉長佑督飭在於交界地方襄辦防剿以資臂助該督前奏檄調李同文督率地方團練並飭熱河官兵馳赴景州扼要堵截仍著責成該道員等及徐廷楷余承恩各軍四面兜擊李同文如尙未到著崇厚迅卽督催前往李鴻章前奏劉長佑過滬所調副將陳飛熊等弁勇三百餘名已由海道北來其續調總兵李明惠湘勇五百名亦取道廣東附輪船前進以上二起兵勇如有到津消息均著崇厚催令前赴劉長佑軍營以資調遣袁甲三昨奏應遣游兵分巡光固及歸德以遏苗逆窺覷之路當諭張之萬等妥爲豫

籌汝匪剿辦事宜如可專由毛昶熙督辦張之萬應赴豫省陳州
沈項一帶何處擇要駐紮著卽籌定奏聞陳州切近皖疆袁甲三
務卽號召紳耆團練速爲備豫袁保恆應畱陳郡幫同辦理抑卽
遵前旨赴張之萬軍營卽由袁甲三酌定飭遵前有御史王蘭谷
奏六安州紳士記名鹽運使李元華謀勇兼優曾經諭令吳棠唐
訓方查明該員是否可用所帶練勇曾否遣散飭令前往天長盱
眙扼紮以防渡江逆匪窺伺裏下河之路刻下六安喫緊如果李
元華足資任使卽著吳棠唐訓方飭令迅速招集所帶練勇會同
該地方官軍合力戰守以期得力苗逆雖有以懷遠與李世忠易
五河縣之信而吳棠昨奏李世忠近有函致該漕督以苗練生變
宜早籌備等語李世忠與苗沛霖本有仇隙此時如可激勵用之
使不遽與苗合著畱國藩吳棠等妥爲駕馭唐訓方原摺著鈔給

僧格林沁曾國藩李續宜閱看片一件著鈔給吳棠閱看將此由
六百里加緊各諭令知之○命直隸總督劉長佑督辦直隸山東
河南三省交界地方剿匪事宜○乙酉諭議政王軍機大臣等譚
廷襄奏河西股匪渡運北竄被擊遁向西南暨接捕沂州餘匪情
形各摺片據奏賊之大隊由尖莊偷渡復經保德等擊之於堂邑
之定遠寨及許家新村冠縣白塔河店燕店等處並由譚廷襄飭
令東昌府調團於清博河岸一帶嚴防訊據賊供欲搶渡運黃二
河赴白蓮池入夥復經保德由沙鎮追至王灣與蘇克金成保等
馬隊合剿大有斬獲餘匪由老君堂偷渡至徐家莊朱北樓等處
趨向西南蘇克金等跟蹤緊躡恆齡向西夾剿等語如果屬實所
贖殘匪不過六七百名自不難於殄滅惟須乘其窮竄前截後追
總不令賊得以喘息所至裹脅方能奏功此時賊勢就衰著劉長

佑譚廷襄聞敬銘嚴督直東兩省官軍迅卽乘機覘賊所向四面
兜剿盡殲醜類蘭費餘匪經黃國瑞及該府縣等疊次按殺仍著
飭令黃國瑞所派駐紮尙巖作子圩一帶之參將吳鳳柱等會合
沂州守令督率民團盡力按捕毋畱遺孽見在由老君堂渡河之
匪業已無多直隸沿河一帶必有伏匪潛匿著劉長佑飭令王榕
吉祝塏等嚴督所屬地方及派出各兵練一律按捕務期淨盡白
蓮池教匪昨諭飭令恩錫督剿茲據譚廷襄奏黃國瑞卽行帶隊
取道嶧縣進剿教匪卽著閻敬銘飭令該總兵會同恩錫辦理俾
速成功將此由六百里各諭令知之○沈葆楨奏休北藍田小溪
之賊經王沐會浙師進剿紛竄黟縣四五等都並蔓延黃土坑等
處不特由漁亭赴祁路梗且有乘虛南竄之勢王沐令王安敦等
力剿此路以通祁門之氣卽出隊至柘木嶺遇賊蟻擁而來我軍

立斃騎賊數十追至橫路頭賊忽分竄左右山谷我軍斃悍賊百餘賊復向雙溪流而遁王安敦等繞出左路之李坑口一帶接殺百餘名忽有另股由柘木嶺擾及李村王安敦等又斬馘二百餘名卽督軍直攻金字牌劉志友由李村進剿高嶺腳會於雙溪流王沐卽進紮橫路頭接應詎金字牌一股先遁其館於高嶺腳及雙溪流嶺內者亦均潰歸黟縣老巢浙江臬司劉典親至漁亭約攻黟縣繼果營由桃源洞進劉典由千里山進王安敦駐橫路頭以杜南竄谷進祿等專防胡葉等村之賊鈔我後路王沐自督親兵出桃源洞抵石山街該逆於石山橋下設卡王沐令劉志友由中路攻卡王萼由右路旁擊而卡右山岡望棚賊隊林立非先毀望棚卡不能下王沐乃大聲疾呼先登者有賞將士勇氣百倍肉薄齊登遂同時攻破賊分左右潰走城賊亦傾巢出援劉典當其

左王沐當其右廐戰一時當將黔城收復王萇賀心田向右路追殺忽有巨股回撲王沐劉典擊卻之劉志友接城中餘匪追出北門轉入山谷伏賊四起劉典更以親兵助之伏賊始退右路潰出羊棧嶺左路潰出方干嶺其南竄橫路頭與葉村胡村之賊均經王安敦等剿敗計斬賊目五名餘匪五六千名生擒五百餘名解散甚夥臣查該逆垂涎江右自皖之績溪西至饒境橫互數百里號稱數十萬幾於防不勝防浙江撫臣左宗棠飭令劉典馳援血戰而前所向披靡今幸賴國家威福克復堅城保障兩江厥功甚偉王沐一軍始則獨當一面連獲全勝茲復協力苦戰迅奏膚功除劉典所部應由左宗棠查明辦理外所有出力之直隸州知州王沐懇恩以知府仍畱江西儘先補用並賞給勇號其在事員弁勇丁容查明另行請獎又奏韓進春一軍於三月十八日遇有股

匪糾集萬餘人來撲韓進春派隊奮力衝之賊倉皇失措我軍跟追數里陣斬數十名見在連日來營乞降者已百餘名聞其尾隊復由石門竄向建德其大股仍在時山許家山一帶自黟縣克復祁門解圍賊勢頓孤軍心益奮據段起報稱於二十一日赴槐田街察看地勢擬與韓進春會商進剿 上諭逆匪垂涎江右自皖之績溪西至饒境橫互數百里王沐一軍屢戰屢捷茲復會同左宗棠所派之劉典一軍克復堅城徽境漸可肅清江防賴以保障實屬異常出力惟黟縣克復之後餘匪追出北門轉入山谷伏賊四起劉典令親軍助剿伏賊右路潰出羊棧嶺左路潰出方干嶺見已歸併何處恐其再來撲城著左宗棠沈葆楨飛飭劉典王沐等各率所部四面接揔務將祁黟一帶零匪除盡毋任再有勾結另片奏韓進春一軍擊剿遇田股匪頗有斬擒其尾隊復由石門

竄向建德界上其大股仍在時山許家山一帶段起見赴槐田街
躡看地勢擬與韓進春會商進剿等語刻下黟縣已復祁門解圍
軍威益振賊勢日孤該撫卽催令韓進春等迅將大股賊匪認真
掃蕩以期爲防又安邊境將此由六百里各諭令知之○諭官文
等奏豫捻被擊西趨見籌兜剿穆騰阿等奏漢中被圍日久請飭
催川楚援軍並河南籌辦軍火各摺片豫捻自上巴河官兵擊走
後由但店東趨蘄水蘄州分竄廣濟經該州縣等攔頭扼截設伏
擊敗折回蘄水適成大吉等軍趕到先後斃賊多名該逆由蘄水
北之團陂回竄三里畈但店一帶擾及黃岡縣屬之夫子河此次
該逆回竄湖北官軍雖頗有斬擒並未大加懲創且據生擒賊供
該逆以兩股游弋蘄廣一帶以六股折回欲由黃安黃陂窺伺武
漢如有官兵扼截卽由舊路回竄河南等情逆蹤剽悍靡常亟宜

嚴爲備禦著官文嚴樹森卽飭舒保穆正春等軍分投堵剿與成
大吉王桐柏等軍前後夾剿務令就地殲除無任紛竄黃陂致武
漢又形震動其豫鄂毗連地方賊蹤往來已成熟徑並著張之萬
毛昶熙飭令余際昌等軍嚴密堵遏儻賊蹤逼近卽行越境會擊
以剿爲防毋任闖入曾國藩前奏捻匪由蕪水分股東越潛太竄
撲舒桐已與渡江髮逆合股何以官文等兩次奏報並未提及是
否游弋蕪廣之賊業已東竄皖疆著嚴樹森仍遵前旨迅將此股
賊匪前截後追毋任陸續東竄與髮逆苗練勾合貽禍鄰封至陝
省漢中被圍日久兵單餉缺岌岌可危官文等前已遵飭李雲麟
率師援陝著卽恪遵前旨迅飭統率所部星馳前進速解漢中之
圍並著駱秉章仍飭周達武一軍就近援剿會合陝鄂諸軍力圖
掃蕩以靖鄰氛其川省應協陝餉卽著速爲籌撥以資接濟至多

隆阿軍火向由湖北轉運茲據穆騰阿等奏接據官文函稱恐鄂省籌解稍有不敷請咨鄰省協濟等語多隆阿大軍見在攻克倉頭鎮老巢正在得手之際儻致軍火缺乏貽誤非輕本日已諭令英桂籌辦解運著張之萬每月籌撥火藥二萬斤火繩二萬盤按月委解潼商道收儲以備要需其湖北應解軍火仍著源源接濟毋得以晉豫分任其事稍存諉卸將此由六百里各諭令知之○諭穆騰阿瑛榮奏新募楚勇到省擬令紮營三橋並令曹克忠統帶駐紮各摺片西安省城糧道不通餓殍載途民情洶懼非早爲疏通勢將內變省城兵數本已不少瑛榮閉關自守不肯派隊出城分扼要隘致成坐困前多隆阿奏派總兵曹克忠管帶烏拉馬隊前往省城將前後所募楚勇七營一併交該總兵帶赴鄂縣茲據穆騰阿等奏稱回匪巢穴盡在北路鄂縣之匪皆由北路竄入

且須由咸陽之三橋一帶經過擬令曹克忠紮營三橋斷北路回匪援鄠之路以安省城西路等語自係實在情形惟昨據多隆阿奏稱倉頭賊巢業已攻拔同朝肅清諒華渭一帶零星餘匪不難剋期剿盡此時該大臣軍營已與省城聲息相通西安東路之防既可稍紓該大臣督辦全省軍務自應兼顧西路軍情旦夕異宜曹克忠一軍應否移紮三橋或仍在咸陽鄠縣交界地方駐紮之處著多隆阿酌度情形咨照穆騰阿瑛棨辦理曹克忠到後馬德昭一軍能否卽派赴剿之處著多隆阿仍遵前旨酌量調派省城附近賊匪仍著穆騰阿瑛棨督飭諸軍出隊接剿以期及早廓清不得專待多隆阿援軍亦不准輕行議撫致貽誤回紳馬百齡前隨張芾及省城委員繆樹本等赴倉頭勸諭回眾嗣張芾等均被戕害馬百齡獨晏然無事在賊中幾及一年仍復輕身回省其

中難保無通匪情事瑛榮前僅奏請撤銷卹典並未將該回紳查辦殊屬輕縱著多隆阿不動聲色嚴密確查據實具奏將此由六百里各密諭知之○以前任江蘇巡撫薛煥署禮部左侍郎並在總理各國事務衙門辦事○予湖北陣亡副將謝鴻禧等祭葬世職建祠○丙戌諭內閣前因陝西回逆煽亂命將出師恭行天討復念漢回皆朝廷赤子明降諭旨令陝甘統兵大員止分良莠不分漢回如實係良回不肯從賊被逆回偏脅奮身死節及合門殉難者仍准分別奏請旌卹茲據趙光奏雲南與陝西事同一律該處殉難官紳士庶暨良回被害人戶歷年均未奏報請旨准卹等語雲南省自漢回構釁仇殺日久漢人之官紳士庶慘遭殺戮者爲數甚多迄今未據該省奏請旌卹致忠義之氣湮沒未彰實堪矜憫至安分良回或被漢人枉殺或被逆回威脅受害情亦可慘

國家威德覃敷豈可令萬里邊隅不沾一視同仁之澤著雲南巡撫賈洪詔督飭各府廳州縣等設局採訪其通省漢人官紳士庶之殉難者著該撫飭令各屬詳查具報彙請旌卹其回人中素行良善不肯從逆致被殺害者著一併確切查明彙請旌卹以示覆幬無私至意○定京城八旗分管界址堆撥○戊子 上詣 大

高殿祈雨○僧格林沁國瑞奏查淄川縣城以石築砌甚爲堅固城外溝壑縱橫進攻非易其中糧食尤爲充足且該逆已與教匪勾結捻棍各匪亦爲之響應若不力籌殲滅勢必滋蔓難圖 臣等

見在督飭兵勇調集民夫挑挖環濠工程業經過半四面設立營盤圍困至白蓮池教匪近將棍匪劉雙印等萬餘人勾入教內賊勢愈大布置益堅每值出山打糧兗州泰安各屬地方多遭焚掠情形甚爲可慮 臣等派營總何建黿候選道趙康侯帶領步隊兵

勇礮位駐紮鄒縣署鹽運使恩錫帶兵駐紮兗州該匪近日未敢出巢民心稍定其捻首張守義等前由淄川南竄經翼長舒通額已革副都統德楞額帶領馬隊跟蹤追剿四月初三初四等日在沂水迤北之馬鞍山寶泉山疊次獲勝斬擒多名其餘敗匪俱向西南翻山狂奔見據署蒙陰縣知縣謝慶元稟稱初六日竄至該縣張莊一帶適值舒通額等趕到賊由蒙山小道南遁舒通額等卽帶兵由九女關一帶跟追查該逆趨向勢必歸附教匪臣等曾飭舒通額德楞額如此股竄入白蓮池卽帶隊馳赴鄒縣會合步隊相機進攻至直東股匪前據恆齡稟報逆首張玉懷等由尖莊搶渡衛河東竄經總兵保德督兵截擊獲勝該逆旋由陽穀縣屬之七級潛渡運河擾及茌平縣境臣等當飭蘇克金迅往茌平一路會同恆齡相機夾擊該翼長於初三日馳抵平原縣探知賊在

縣城西北十五里盤踞當卽帶隊進剿行至王灣地方卽遇大股賊匪馬步三千餘名列仗抗拒該翼長及副都統成保薩薩布翼長海羣營總訥勒亨額達爾濟分路齊進奮力衝壓賊勢不支紛紛敗潰追殺六十餘里殲斃賊匪二千餘名其餘馬賊六七百名狂奔竄逸據生擒賊供該逆欲由桑家園渡河回竄蘇克金遂帶隊赴運河東岸以防偷越並派隊由德州西街內浮橋過河前往桑家園運河西岸堵禦詎行至德州該處外圍各門緊閉不肯放行蘇克金差官告知前情並約德州地方文武會面乃城守尉富明知州張應翔置若罔聞仍堅閉不納蘇克金等被其阻隔致令潰逃餘匪乘夜由老君堂渡過運河向北竄奔蘇克金另行覓路過河初五日追至故城縣探得該逆向棗強縣一路回竄蘇克金等仍帶隊跟蹤追剿伏思此股敗殘賊匪見雖折向西南而南路

尙有恆齡馬隊暨直隸總督劉長佑所派防河官兵亦必實力堵截該逆一經受創勢必又復北趨臣等已飭蘇克金駐紮河閒適中地方嚴防北竄並飭恆齡成保薩薩布海羣各軍跟蹤追剿毋任該逆再行滋蔓至苗沛霖叛迹已彰臣等未嘗不亟思南下第目睹直東情形若不速籌掃蕩其患更有甚於苗沛霖者臣等權其緩急苗沛霖一節此時勢難兼顧惟有請旨飭下南路各軍先就見有兵力認真防剿一俟直東賊匪掃除淨盡民情穩固臣等卽當馳赴蒙毫再圖進剿斷不敢稍事遷延 上諭議政王軍機大臣等見在圍攻淄川及籌剿白蓮池教匪僧格林沁所籌均極周至其追剿南竄之張守義等股匪及北路追剿竄匪於荏平等地方獲勝等情與譚廷襄劉長佑奏報大略相同此股竄匪據稱僅餘馬賊六七百名經僧格林沁飭令恆齡及成保薩薩布海羣

各軍探明賊蹤實力追剿與劉長佑所派直省各軍前後夾擊其
蘇克金一軍僧格林沁飭令馳赴河閒豫備迎擊嚴防北面藩籬
辦理甚爲妥協卽著僧格林沁劉長佑嚴督諸軍務卽乘機速將
此股竄匪探蹤四面兜剿殄除淨盡仍著劉長佑閻敬銘嚴飭直
東所屬各該地方實力嚴防毋任餘匪被剿乘虛衝突並將沿河
伏匪一律按除嚴飭防河員弁認真巡察毋稍疏懈前因唐訓方
張之萬袁甲三疊次奏報苗沛霖復行叛亂逆燄驟張節經寄諭
僧格林沁將淄川圍剿事宜移交閻敬銘督辦卽行返旆南征茲
據僧格林沁奏稱目睹直東情形若不立籌埽蕩其患更有甚於
苗沛霖者擬俟直東賊匪剿除淨盡再行回軍蒙亳等語苗沛霖
陰鷙狡詐蓄謀甚久而煽脅尤眾若不早圖勢將謀據淮甸蔓延
東豫以窺中原其患實非淺鮮唐訓方見有兵力不敷攻剿非得

僧格林沁回軍斷不足以制其死命惟直東軍情緊切自應布置妥協方可返旆南征但亦不能定俟直東兩省全行肅清始議南征久稽時日著僧格林沁趕緊部勒飭催恆齡及蘇克金等軍將北路竄匪剋日掃除其淄川城匪及白蓮池教匪圍剿事宜即可交閻敬銘等督辦淄川城小而堅攻擣定須時日白蓮池亦負隅自固之賊未能遠出但能將四面圍剿布置周妥閻敬銘雖初任封圻辦事認真當能接辦該署撫見已到任於東省軍務責無旁貸並著飛催丁寶楨迅速來東以資任使張守義等竄匪如果竄入白蓮池即可會合德楞額黃國瑞等軍併力進剿聚而殲旃其譚廷襄摺內所奏又有另股竄由泰安上下嶗峪等處至甯泗境內之賊並著閻敬銘嚴督地方兵團實力剿辦東省萑苻甚眾各屬地方似此散股恐尙不少該署撫履任方新均須督率整頓毋

得率聽屬吏粉飾因循致負委任譚廷襄已卸撫篆卽著前赴工
次將河東河道署任事宜專心辦理見在節逾小滿所有勘工催
料均關緊要毋稍疏忽宋憬詩與柳林團互殺顯係有意尋仇其
能否暫事羈縻著劉長佑閻敬銘詳加調查相機辦理將此由六
百里各諭令知之○諭毛鴻賓奏攻克青山等處賊巢籌畫晃靖
邊界防堵並續辦土匪各摺片會匪張芝蘭等由澈浦逃入芷江
辰谿交界之帽子坡復竄踞蘆坪等處經遊擊田宗營等分路進
攻連日將青山帽子坡兩處賊巢攻克剿辦尙屬得手惟逆首尙
未就獲見在敗殘餘匪均向楠木山竄去著毛鴻賓卽行督飭士
卒嚴密圍捕務將此股悉數殲除並將首匪斬擒毋畱遺孽黔省
清江苗匪糾合教匪襲陷古縣城池並分股竄近永從縣以拒楚
師勢將圍攻黎平郡城從前投誠積匪余老科唐一輔等陰附賊

匪益以游勇痞棍近數萬人黎平勢甚危急毛鴻賓擬飭戈鑑一軍酌察事勢先往靖州邊界堵剿著卽相機辦理並俟本境土匪肅清卽飭防界各軍赴黔援剿至黔省清江苗教各匪勢成燎原迤東各處亦徧地糜爛非痛加剿洗不足以戢兇頑而靖地方張亮基務當籌撥兵勇迅速馳援黎平會同楚軍合力夾擊以期掃蕩逆氛並將思銅一帶教匪會剿淨盡以消兩省邊患毋得因循貽誤其湖南衡永郴桂一帶土匪伏匿甚多經毛鴻賓飭屬訪查將常甯之李功名衡陽之黃國積等謀逆各犯擒獲多名分別正法訊辦並將益陽縣等處會匪頭目胡花臣捕獲消患未萌辦理甚屬妥速著卽將此兩案餘黨實力接捕毋任一名漏網該撫務須飭在事文武認真辦理不可稍存姑息之見將就了事以致貽患將來將此由六百里各諭令知之○庚寅諭議政王軍機大臣

等劉長佑奏官軍越境剿賊獲勝逆首畏罪輸誠一摺據稱馬步各軍追賊於平原曲周等處屢獲勝仗首逆楊朋嶺等悔罪乞降見已令其呈繳器械馬匹暫畱軍營派都司唐建勳等妥爲照管等語楊朋嶺屢降屢叛此次被擊窮蹙又復乞降劉長佑因宋憬詩等相距不遠暫將該犯畱營固屬一時權宜之計惟若輩狼子野心終難馴服著嚴督都司唐建勳等妥爲羈束毋令再有逃逸至前此投誠之程順書等及此次楊朋嶺等首夥各賊該督能否派令隨同官軍作爲前敵察其勇怯以覘其真僞或卽咨商僧格林沁分撥該大臣軍營妥爲安插如該匪等首鼠兩端心懷反覆卽可不動聲色設法殲除以絕後患儻敢敷衍目前貽患後日必惟劉長佑是問直境雖就肅清而河東伏莽尙多仍須及時接剿閻敬銘到任後疊經諭令進紮淄川俾僧格林沁得以統兵南下

該處軍務一日未竣該署撫卽一日不能他往其莘冠一帶防剿善後均關緊要必須遴委明幹大員前往辦理總兵保德平日帶兵尙無貽誤或卽責成該員會同直隸官軍認真按捕能否得力之處並著劉長佑閻敬銘會商妥辦將此由五百里各諭令知之○諭恩麟奏賊匪竄圍靜甯經兵團擊退及鹽茶廳被陷憑陳甘肅急迫情形請飭催馬德昭赴援各一摺此次賊匪竄圍靜甯該署知州恩祿與參將李友伏等痛加堵剿生擒黃袍黃桂賊目數名以致身受矛傷洵屬奮勉而隆德神林鋪團首趙合璧等越境赴援尤能深明大義深堪嘉尙所有在事出力員弁准其查明奏請獎敘惟此股逆回雖竄回固原等處老巢難保不乘隙復竄恩麟見飭王吉利駐紮隆德王德恆駐紮靜甯卽著責成李友伏等會同民團實力防剿毋稍疏懈至王大桂前赴固原城內責詰穆

喇二逆該逆等既俯首伏罪何以忽又四門緊閉王大桂爲該逆
按捉之人何能縋城逸出所稱各情節殊多支離恩麟何以於此
等緊要關鍵不加詳察據探廳城失陷後王大桂與子王忠等逃
回圍莊調人被賊追獲是否實係被害回性詭譎恩麟不可純以
忠厚待人致墮奸計務當隨時畱心察看如有端倪卽行嚴辦以
杜內應並著就見有兵力督飭員弁相機堵禦以待援兵見在多
隆阿已將東路肅清若由三原進兵則西安北路可以無虞潼關
至省城雖有回匪諒多隆阿已乘勝掃蕩計可肅清卽著斟酌形
勢若能由三原馳赴西路則馬德昭卽可迅回甘省穆騰阿瑛棨
防守省垣之滿漢兵勇爲數甚多但能調度合宜何至一籌莫展
著卽商同多隆阿妥爲布置毋得輒形怵怯馬德昭於接奉此旨
後卽著咨商多隆阿迅速帶兵馳赴慶陽會同熙麟節節進剿迅

解平涼之圍疏通道以靖邊圉熙麟馬德昭均係本省文武大員責無旁貸務當妥籌至計以副委任多隆阿行抵西路卽著與雷正綰和衷商酌應如何分投剿辦之處卽行妥籌辦理將此由六百里諭知多隆阿穆騰阿熙麟瑛榮雷正綰馬德昭並傳諭恩麟知之○予直隸陣亡知縣畢世容祭葬世職建祠○辛卯諭議政王軍機大臣等前因御史吳台壽奏奉省東邊閒曠之地多未開墾錦州廣甯義州一帶官荒馬厰儘可設法變通請飭實力履勘以開利源當經諭令恩合悉心查奏茲據恩合奏稱錦州牧馬之區名爲西厰水草豐茂足敷牧放此外則廣甯所屬之閭陽驛小黑山等界名爲東厰地勢平坦內有窪陷於牧放不甚相宜若將東厰裁撤一律開墾可得田一百萬畝惟東邊一帶近有流民在彼私墾聚集日眾查辦甚難請派封疆大員詳酌籌辦等語閭

陽驛小黑山等界舊設牧廠旣據恩合奏稱地勢低溼於牧馬不甚相宜而大淩河西岸地勢寬廣卽官馬多至一萬餘匹亦足敷用卽著照該副都統所議將東廠裁撤歸併西廠牧放遵照舊章妥爲經理其應墾廠地卽照恩合所擬令盛京六十六佐領下甲兵按名分領招佃取租除交升科租銀外餘資津貼常差其按年應徵租銀卽責成各該佐領催交造報以收裕餉使民之效該副都統本係盛京旗員情形熟習所陳墾田一百萬畝之說諒必確有把握卽著該副都統妥爲經理實力舉行不准稍存諉卸之心至盛京東邊一帶閒曠山場林木稠密奸民流民聚眾私墾歷年旣久人數過多經理稍失其宜卽恐激成事端利未興而害立見於根本重地殊有關繫著玉明會同恩合將東邊自鑿陽邊門以北何處必應照常戍守何處可以展墾地畝流民之屯聚者何以

化梗爲良隱患之未形者何以潛消默化不動聲色嚴密訪查妥議具奏候旨遵行此事朝廷早有所聞利害攸關固不能不消患未萌亦不肯孟浪從事王明恩合務卽密查據實具奏不准一字欺飾俟奏到時再行妥籌辦法亦決不咎其既往將此各諭令知之○以潞鹽滯銷諭劉長佑等嚴禁蘆課侵越並酌裁河南魯山等處鹽釐局卡○壬辰沈葆楨奏三月二十四日僞堵王黃老虎由祁門界桃墅鎮一路帶領悍賊十餘萬與許家山陳家嶺等處踞匪會合次日逆眾傾山倒海而來營官王大魁等率槍隊六百名憑河扼之該逆分路從上下游竄渡欺我軍勢孤冒煙而進韓進春見眾寡懸絕非猛戰不可令收回槍隊讓其過河調馬隊迎剿行至中途被該逆圍住過河之逆喊聲大震韓進春望見賊環長壕數市後隊迤邐四五里因令長夫火夫站立營牆十營士卒

拔隊盡起親率死士衝其右翼引出西路左右營之兵楊必遇等
統馬步突圍而出撼其左翼韓鳳飛等直擣中堅賊陣屹立不動
將士憤極短兵相接人人致死賊乃披靡我軍偪至河邊該逆憑
水死戰我軍復卻適韓進春擊退西路之賊以親兵及左右營馳
至東路之賊爲馬隊所偪併歸中路我軍三面夾擊賊遂大潰自
相踐踏積屍盈渠自巳至申血戰四時弁勇中有一人殺四五十
賊者計陣斬千餘人割取首級五百餘顆淹斃者不可勝數據生
擒賊供黃逆以皖浙無糧圖竄江西以達楚粵見在退至離營三
十餘里之楓樹壠一帶仍飭加意嚴防毋任竄越又奏據韓進春
稟稱擒獲逆首鄧懋發一名供稱從賊最久因覓僞哮王胡鼎汶
屍首該將飭於積屍中辨認有穿藍襖袖盤金龍者曰此僞哮王
胡逆也復獲陳士發一名供亦相同是胡逆確已伏誅 上諭議

政王軍機大臣等韓進春親督士卒奮力擊賊以少勝多殺賊無數陣斃僞哮王胡鼎汶一名實屬異常出力惟黃老虎尙未就擒該逆見退至離營三十餘里之楓樹壠一帶難保不乘隙復出滋擾仍著督飭韓進春一軍加意嚴防毋任竄越段起一軍前據該撫奏報已赴楓田街躡看地勢擬與韓進春會商進剿刻下祁門賊勢甚蹙卽著飭令該道員等一鼓作氣實力勦辦務將黃逆殲除毋畱餘孽以靖邊防將此由六百里諭令知之○癸巳諭內閣李續宜奏途次患病悲痛未釋請仍開巡撫署缺專辦軍務等語奪情起復本係朝廷不得已之舉旣據該署撫瀝情陳奏至再至三自當曲體下情勉從所請李續宜著准其開署安徽巡撫之缺仍專辦皖北軍務迅速前赴軍營毋稍遲延○張之萬毛昶熙奏查尙店寨在項城之北素稱富足良莠不齊因寨內匪徒趙瀝岡

與趙丹桂結訟挾仇遂於我軍收撫馬姜寨後句結捻首王九現
徐四萬吳萃亭李如淞等入寨抗拒我師當派已革總兵張曜統
帶豫勝等營分投進攻復飭陳州府知府劉拱宸會同刑部郎中
袁保慶帶團策應並挑濠兩道嚴防竄逸至三月初八日張曜督
帶兵勇圍攻親然大礮轟踰寨牆礮樓兩處擊斃悍賊多名該逆
拌死負隅急難得手二十七日夜張曜同劉拱宸袁保慶等復行
進攻竭兩晝夜之力至二十九日夜派周口練長蔣秀章隨同羅
輔臣隊內兵勇由東北角開挖地道安放地雷三十日卯刻開放
礮踰寨牆五丈有奇各營將弁同時猛進逆眾猶復死拒我兵愈
戰愈勇殺斃悍賊數百名當礮踰寨牆之際忠靖營營官李忠奎
奮勇先登連受礮傷立時陣亡守備王占鼐等均身受重傷不肯
少退候補知縣張世樞等催戰愈力兵勇傷亡不少攻擊數時未

能搶入四月初一至初四日歷四晝夜未能撤隊是晚捻逆吳萃
亭帶同三十餘人越牆逃出乞命投誠訊知逆眾窮蹙意欲遁逃
並知捻首徐四萬王九現吳玉衡李度玉等先後均爲我軍轟斃
張曜遂傳令各軍揚言撤隊密伏濠外逆眾果於五更時全股衝
出我軍陡起截殺匪勢不支退回寨內我軍乘勝由臨踴處所並
南北兩門跟蹤直上立時搶入巷戰多時殲斃賊匪千餘名生擒
著名捻首李如淞阜陽教匪連登榜汝陽捻首趙濬元趙幅元王
九芳王九添項北捻首趙瀾岡趙瀾堂趙三俊趙周趙休施金山
項南捻首徐步蔥閻金桂並教匪任中仝卽任洗任開山任小張
玉堂金道士及悍賊三百餘名救出被脅男婦八百餘名起獲賊
馬四百餘匹查此股賊匪均係各路失巢首逆兇悍異常今幸將
士戮力同心將逆眾全行剿滅汝東項境一律肅清所有尤爲出

力各員相應開列請旨給予獎勵其餘出力文武員弁容臣等查明彙案請獎陣亡之忠靖營營官副將銜候補遊擊李忠奎擬請飭部照副將陣亡例議卹以慰忠魂上諭河南賊匪趙瀉岡等勾結捻首王九現等盤踞項城所屬之尙店負隅抗拒經已革總兵張曜等督帶兵勇環攻三月初八至四月初四等日該逆疊次拚命死拒官軍合力進剿立將尙店攻克生擒著名首匪李如淞等十九名賊黨殲除殆盡副將銜候補遊擊李忠奎中礮陣亡著照副將陣亡例賜卹在事尤爲出力之已革總兵張曜著開復原官○唐訓方奏苗逆自蚌埠敗歸復添大股死守懷遠並於淮河南岸之李家觜北岸之黑窯一帶密排營壘其迤東三十里有苗黨吳昆田匪圩爲進兵必由之路我軍進紮蚌埠吳昆田詭詞乞撫潛往附近各圩聚黨以圖抗拒總兵張得勝普承堯朱淮森等

乘其未備於四月初四日夜往襲將該圩平毀後路旣清我軍進
逼黑窯而營初九日進攻賊壘該逆萬餘出拒鏖戰逾時賊始敗
退我軍乘勝跟追直抵賊壘張得勝等奮力猛撲越濠踰垣而入
破其外壘殺賊數百名賊憑內牆死拒副將劉名典亦率水師前
進轟沈逆船三十餘隻斃賊無算忽懷遠城賊以礮船繞出河濱
步隊之背施放大礮子飛如雨張得勝等恐傷精銳麾軍退數十
步列陣以待復令輕騎挑戰欲誘其出以擊之該逆堅閉不出我
軍收隊回營至壽州被圍後據署知州毛維翼稟稱賊於城外紮
營數十座礮船數百隻四面環繞文報不通三月二十五日夜賊
以礮船載雲梯由西南湖逼攻毛維翼督率兵練登陴力戰以大
礮轟沈賊船三十餘隻斃賊數百名賊始遁去二十七日夜賊撲
南門復經毛維翼擊斃百餘人該逆旋以礮划分攻東西兩門均

經擊退又有大礮船百餘隻望北門城垛開礮繼以步賊數千直撲城根經我軍用礮轟沈十餘隻斃步賊二三百人賊遂四散狂奔將礮划駛回下蔡又據馬新貽稟稱犯蒙之賊添壘數十我軍屢挑不出蓋知我營軍糧已匱欲爲坐困之謀四月初二日賊圍蒙城迤東之白家圩令與城中阻隔馬新貽恐糧路不通急令副將程文炳等往援該圩練總知州丁叶蘭見官兵已到率練出擊兩面夾攻斬馘數十名賊遂敗歸是夜復令死士潛砍賊營破其六壘查苗逆雄踞淮上勢甚鴟張雖經我軍屢挫兇燄而該逆知我外乏援師內無儲積以悍黨力扼懷遠以小股牽綴壽州親率大股合圍蒙城復糾髮捻二逆旁擾鳳臨蓄謀甚爲兇狡見據疊報苗逆盡擄下蔡民船千餘號意欲乘勢東下況蒙亳永宿之降眾阜霍靈固之苗圩類皆首鼠兩端其尙踞伏未動者特謂僧格

林沁之軍旦夕至皖耳若不急救蒙城必致降眾苗黨並起應之大局不可復問惟有仰懇 天恩飭催僧格林沁星夜督兵援蒙庶可安反側而支危局壽州一路李續宜抵皖無期實無會剿之師臣已函商曾國藩檄鮑超從廬定節節前進赴援壽州未審能否如願豫省諸軍與其駐守歸陳曷若進兵潁上三河尖等處四面兜剿使該逆疲於奔命至蔣凝學一軍本歸曾國藩調遣該道見據舒城一分於江北再分於三河三分於六安其潁州僅新軍四營守則有餘戰則不足臣惟有拊循飢卒力保東路以待援師又奏臣自聞苗逆句合髮捻圍撲六安當卽飛函商請提督鮑超相機進剿並飭臣部駐防廬州義字三營撥隊馳赴舒桐迎護軍餉詎該逆震於鮑超威名聞其已到舒城卽解圍遁至壽界爲壽南各圩練丁所蹙竄至定遠之鑑橋四月初八日竄至鳳陽曹家

店初九日撲定遠縣城初十日逼近鳳陽蔓延鳳屬之劉府總舖
一帶縱橫百餘里火光燭天文報梗塞無論鮑超能否赴援尙未
可知卽令前來而軍米無從購買亦難成行至臣營兵力已極單
薄兼之軍無數日之糧火藥鉛丸在在缺乏似此糧盡援絕大爲
可虞所幸臣自赴臨以來宣布恩旨激以忠義各圩紳董尙能集
團殺賊臣惟殫盡血誠視力之所能爲者爲之成敗所不敢知也

上諭議政王軍機大臣等唐訓方奏臨淮官軍剿苗踴破吳家
匪圩進規懷遠壽州蒙城擊賊獲勝等情形暨苗逆句合髮捻已
由六安進撲定遠而偪鳳陽各摺片苗逆自敗歸蚌埠復添水陸
大隊死守懷遠並於淮河南岸之李家觜北岸之黑窯一帶密排
營壘其地東三十里又有逆黨吳崑田匪圩阻我軍進攻之路而
該逆以小隊分擾壽州親率大股合圍蒙城逆意專欲持久以待

官軍糧盡自潰經唐訓方飭令總兵張得勝等乘閒進兵將吳崑田匪圩踣毀官軍進徧黑窩攻破外壘水陸斬獲甚眾其圍攻壽州之賊均爲署牧毛維翼等擊走蒙邑城外賊營數十以深溝高壘困我並圖蒙東之白家圩令與城中阻隔馬新貽令副將程文炳等往援與該圩練內外夾擊頗有斬獲惟守備李加英以追賊過猛馬蹶被擄而程文炳等復夜斫賊營破其六壘壽蒙守禦尙足自完進攻懷遠之軍亦尙足以挫其兇鋒苗逆盤踞淮甸練多糧足唐訓方以賊欲久持困我官軍利在速戰以伐狡謀實爲切中機宜本日李續宜復奏行抵湘鄉縣城因病耽延懇請開其署撫之缺責令專辦軍務業經明降諭旨允其所請仍催令迅速前赴皖營並已有旨將唐訓方補授安徽巡撫該撫身任疆圉當茲巨寇猝興更屬責無旁貸著卽督飭所部力圖懷遠並拊循各路

之軍激勵團練屏障鳳臨督令蒙城壽州文武竭力戰守惟是臨淮兵單餉絀獨力禦苗已虞不及此時該逆復句合髮捻由六安以進撲定遠逼近鳳陽蔓延所屬之劉府總鋪一帶縱橫至百餘里逆勢鴟張並聞苗逆盡擄下禁民船裝載悍黨萬人意將乘勢東下蒙亳永宿之降眾阜霍靈固之苗圩類皆首鼠兩端特以僧格林沁之軍早晚即可到皖故皆踰伏未動若令日久肆煽勢必並起應之前經邊諭僧格林沁迅即回軍赴皖剿苗實屬萬不得已此時直東股匪殘敗淄川圍攻及白蓮池進剿各事宜該大臣當已布置周妥著即遵前旨移交劉長佑閻敬銘督辦僧格林沁即行返旆南征仍於蒙亳擇要駐紮節節進攻不可輒行深入一意直前致爲逆黨包鈔後路是爲至要蘇克金一軍聞已由該大臣飭令回剿苗逆其餘尙有何路官軍即行酌量調遣以厚兵力

壽州一路李續宜到皖尙未有期鮑超之軍能否從廬州定遠一路進援著曾國藩相機調遣如李續宜病未稍減未能卽日赴皖而鮑超之軍又未能赴援壽境如何另籌勁旅以顧壽州一路之處著曾國藩唐訓方迅籌妥辦毋稍疏虞唐訓方旣力保東路其東北一帶兵力空虛著吳棠嚴飭黃開榜等勤加偵探遏其北竄豫省官軍駐守歸陳不若越境以剿爲防卽著張之萬等飭令進兵潁上三河尖等處與皖軍四面兜剿以期得力唐訓方所部各軍節經分布蒙城長淮衛等處臨淮兵力旣單軍火餉需在在缺乏此時他處無可指撥惟有曾國藩就近尙可勉籌接濟卽著該大臣設法運濟諒曾國藩必能盡力籌措以顧全局也唐訓方另片奏捕獲附逆之訓導元繼曾當卽正法所辦甚是其知州陳之錡一員旣有侵吞軍餉罔利營私及藉端挑釁等重情該撫請將

所欠餉鹽勒限比追發往軍臺不足蔽辜著卽在軍前正法以昭炯戒淮甸悍俗遭值寇變頻仍恣睢暴亂之徒及依草附木者必須重加懲治其中如有恃符狡展卽著該撫便宜從事毋稍牽掣致悞事機其各圩紳董有能激勵奮發集團助剿者亦卽優加獎勵俾賊不得肆其誘脅且使備多力分以孤其勢僧格林沁回軍在卽先聲所播自可令反側潛消唐訓方定能因勢利導也正在寄諭間張之萬毛昶熙奏到余際昌追剿捻匪獲勝及李世玉等剿辦直東竄匪李續燾所帶勇丁因病裁撤等摺片所奏總兵余際昌追剿竄鄂捻股於沙子岡獲勝並將回竄之賊夾擊於淮河南北等情形卽著張之萬等飭令余際昌與添派之副將孫之友等軍併力擊剿盡殲醜類直東股匪竄擾湖北連界其由成安境內被擊東竄及臨漳屬境擊往東北竄走之賊仍卽督飭參將李

世王等實力勦辦與直東各路官軍隨時聯絡兜勦埽除淨盡李
續燾所部湘軍著張之萬酌量遣撤參將張士元所帶馬勇卽著
照所擬歸袁保恆統帶赴陳以資防勦其防勦機宜仍著袁甲三
妥籌辦理將此由六百里各諭令知之○諭奪情起復本朝廷不
得已之苦衷見在皖北軍情緊要如此唐訓方兵單餉絀僧格林
沁全軍爲直隸山東賊匪牽掣未能卽時南下亟須李續宜赴皖
援勦該前撫諒能仰體朝廷盼望之殷早赴皖北無待催促也苗
練久蓄異謀李續宜前在皖撫任內曾力主勦苗之議時以苗練
尙在依違未克聲罪致討見在顯行叛逆李續宜正可一意進剿
藉伸素志頃據唐訓方奏稱苗逆已勾結髮捻由六安進撲定遠
而偏鳳陽圍攻壽州之賊水陸環繞並添集大隊盤踞懷遠又謂
知臨淮缺餉於淮河兩岸密排營壘親率大股合圍蒙城欲爲持

久之計以待官軍糧盡賊多兵少力難支持情形萬分危急李績
宜務當仰體朝廷拯民水火之心力疾赴皖會剿苗練早殄逆氛
以全大局並迅將起程日期馳奏以慰廑念將此由六百里諭令
知之○李鴻章奏太倉克復後總兵程學啟會同戈登乘勝進攻
崑山三月十六七等日總兵郭松林等追剿茜涇支塘餘逆擒斬
無數太倉境內一律肅清與常熟福山各營來往通氣程學啟等
督帶所部進偏崑山東門跨河立營猛攻兩日未能卽下戈登遂
暫撤回松臣因太倉新復崑山軍情未定帶隊由嘉定馳赴太倉
與李鶴章會籌布置於太倉北門外通常熟蘇州之路分紮八營
以堵援賊二十三日臣往程學啟崑山營次察度城賊情形周歷
婁江青陽江吳淞江各河道派淮陽水師陽利見等三營分扼水
口與陸軍相爲依護越日由水路折往青浦飭守將滕嗣武加意

嚴防如蘇崑窮寇乘虛內竄與見駐干墩水陸各軍互爲援應二十七日及松江府城面商戈登添備攻具剋期赴崑山會剿是夜仍馳回上海據程學啟稟稱四月初一日派副將劉士奇由東門滾紮北門外月河橋步步進蹙程學啟帶三營隊伍前往更樓橋周市一帶察勘地勢有賊千餘紛紛竄伏卽飭參將周良才等排開隊伍該逆見我軍嚴陣而來遂退回城中程學啟卽飭周良才等就地扼紮以杜該逆由北門出竄初二日劉士奇至月河橋紮營程學啟親督洋槍隊並陽利見礮船前往堵禦該逆瞭見我軍已紮營牆卽糾大股由南門衝出並於城上開礮抵拒程學啟令各軍一面紮營一面奮勇截殺斃賊數百名該逆敗退入城劉士奇立定營盤距城不過數十丈擬借輪船大礮兩尊併力轟打礮能得手卽搭造浮橋渡過奮勇爬城戈登昨由松來滬亦約定帶

隊前往會攻探聞崑新城賊欲糾蘇州踞逆僞王譚紹洸合力抗拒然屢敗之餘勢已窮蹙僞忠王李秀城已帶大股赴皖北巢縣廬江等處與鮑超各軍相持似難速回救援或可乘此機會迅克崑城如崑城可得則與常熟各軍進規蘇州前路河湖交匯支汊皆通水師既易得力陸軍亦便分扼其常州踞逆僞護王陳坤書一股見由楊厓顧山圖窺福山壘經總兵劉銘傳等分兵截剿嘉興踞逆僞聽王陳炳汶一股赴援杭州富陽又分股圖撲章練塘洙涇一帶以牽掣我師亦經參將曾敏行等師船合力擊退上諭總兵程學啟一軍於太倉肅清後進偏崑山東門一面紮營一面奮勇截殺斃賊甚眾該逆敗退入城見在官軍已薄崑山城下勦辦極爲得手卽著照李鴻章所擬迅借輪船大洋礮兩尊調齊水陸隊伍併力圖攻速將崑城克復以期步步進偏爲進規蘇

州之計戈登既由松來滬商借英國礮火約定帶隊前往會攻著李鴻章卽飭戈登帶同常勝軍卽日前往崑山協剿毋得稍涉遲滯致誤戎機惟崑山攻剿愈形得手則蘇城之賊勢必圖竄江北既得就食裏下河完善之區卽可掣動南岸官軍之勢本日據李鴻章奏稱僞忠王李秀城已帶大股赴皖北巢縣廬江等處與鮑超各軍相持等語是其窺伺江北狡謀已可概見著都興阿富明阿督飭各軍嚴密布置加意防禦江北關繫極爲緊要該將軍等務當慎之又慎毋得稍有疏失致爲該逆所乘將此由六百里各諭令知之○諭熙麟奏涇州獲勝並延綏官兵已抵慶陽飭赴平涼一摺白吉原之賊窺伺涇州直撲小垣營壘經遊擊馬天祥與駐防都司范銘分路迎擊將賊擊敗該遊擊統帶驍捷營於援兵未至之先初次接仗卽能以少勝眾甚屬可嘉著熙麟傳旨嘉獎

並與都司范銘先行存記俟續有勞績再行奏請獎勵惟平涼被圍已久該逆以地雷轟塌城垣十餘丈雖經守城兵勇搶築賊仍晝夜環攻亟宜迅圖援救見在該督已飭馬天祥等帶兵馳赴平涼而參將阿章阿所帶延綏鎮官兵一千餘名又已馳抵慶郡該督已派知府和英會同阿章阿統帶前赴平涼進剿兵力旣形厚集且涇州之捷先聲已振卽著熙麟督飭該員弁等迅解平涼之圍以期節節掃蕩大彰撻伐毋畱餘孽該督另片奏前奏阿拉善兵已抵固原率據稟詞入告自請察議等語已於片內批示加恩寬免嗣後於軍情賊勢務當偵探明確以免貽誤將此由六百里諭令知之○實授唐訓方安徽巡撫○予河南陣亡遊擊李忠奎浙江殉難知府瑞春知縣許承岳祭葬世職○予安徽殉難知縣濮煒吳景春主事承壩祭葬世職○甲午禮部議定先賢先儒祀

典位次頒發各省○允吳棠奏飭記名鹽運使李元華集團助剿
○予江蘇陣亡同知朱寶善祭葬世職○乙未諭內閣禮部奏朝
鮮國王李昇遣員以先誣未盡昭雪請將謬妄書籍懇恩刊正一
摺朝鮮國王先系源流與李仁任卽李仁人者族姓迥別我朝纂
修明史於該國歷次辨雪之言無不一一備載仰見 列聖睿裁
折衷至當久已頒行天下中外皆知今該國王因見康熙年間鄭
元慶所撰廿一史約編記載該國世系多誣遣員奉表來京籲請
刊正情詞肫摯具見誼篤本根實事求是鄭元慶約編一書如所
稱該國王國祖康獻王爲李仁人之子實屬舛誤惟係在明史未
修以前村塾綴緝之士見聞未確不免仍沿明初之訛豈足徵信
該國有原奉 特頒史傳自當欽遵刊布使其子孫臣庶知所信
從約編一書在中國久已不行亦無所用其改削著各省學政通

行各學查明曉諭凡該國事實應以欽定明史爲正如有前項書籍流播士林其中訛載該國之事不得援據以歸畫一而昭信守○劉長佑奏查渡河東竄餘匪其爲首者係張玉懷與姚汰來等咸豐十一年間各股教匪被勦窮蹙均赴勝保軍營乞降惟張玉懷始終怙惡不肯投誠同治元年十月間張總愚同族匪錫珠率黨倡亂迫張錫珠被官兵陣斬後該匪卽併有其眾所到之處焚掠尤甚本年三月間該匪竄渡滹沱河意圖北犯實屬罪大惡極臣與臬司王榕吉通永鎮徐廷楷商派都司楊建勳密諭楊朋嶺將該匪誘擒來營訊明後極刑處死並示諭被脅餘匪如能悔罪歸農從寬免究查楊朋嶺收營數日卽能誘擒巨惡足見真心投誠應請天恩免其治罪予以自新之路上諭匪首張玉懷怙惡不悛久稽顯戮上年十月間張錫珠率眾倡亂該匪首先慾

憑由山東萃冠一帶擾及畿疆追張錫珠被剿伏誅該匪併有其眾直東一帶被其蹂躪實爲積年著名悍賊罪大惡極見在官軍剿辦各股竄匪漸次撲滅該匪被剿窮蹙意圖遠颺乘隙再逞經劉長佑飭令都司唐建勳密飭楊朋嶺將該匪擒獲訊明後極刑處死實足以申天討而快人心楊朋嶺自投誠收營後卽能擒獲巨惡尙屬出力不能不予以自新之路著加恩免其治罪○諭前因文煜奏總兵伊綿阿縱賊搶掠到處逗遛各情當經降旨將該總兵革職交該督等審明定擬具奏茲據劉長佑奏親提伊綿阿到營逐款審訊該革員與道員秦聚奎分路剿賊在焦莊與另股賊匪接仗而秦聚奎於白塔集失利陣亡並非有意退縮上年十二月間該革員追賊至冀州文煜催令赴衡水行營聽候調遣有文煜照會可憑實非遷延不進該革員於衡水拔隊南追於次日

趕到嗣因行至趙莊見有旗幟派員往返查探因較各隊到遲刻
餘尙出有因其兵勇偶有動取民間物件者均經隨時懲辦兵勇
口糧悉由糧臺支發並無縱兵搶掠及任意開銷情事惟伊綿阿
以總兵大員雖無前項劣蹟而於本轄汛地當賊匪搶渡過河既
不能遏截竄路迨逆匪到處紛擾又不能迅速撲滅孤恩溺職莫
此爲甚劉長佑奏請將伊綿阿發往軍臺效力贖罪實屬咎有應
得惟據該督奏稱訪察輿論該革員平日聲名尙好著准其暫畱
軍營效力贖罪儻再不知奮勉卽著起解○諭前因文煜奏參將
王恩第通賊擾民各情當經諭令該督等訊明正法復於劉長佑
到任後諭知該督嚴密辦理茲據奏稱遵旨將該革員提至軍前
正法等語所辦甚是王恩第以參將大員輒敢廣集黨與私通賊
匪到處擄掠實屬罪不容誅所有該部勇丁業經罪坐主將卽著

妥爲遣散免其查究嗣後各路軍營帶勇員弁務當恪守軍律奮
勉立功儻有通賊搶掠各情卽著統兵大員及各督撫等隨時查
辦毋稍姑縱○僧格林沁國瑞奏疊奉諭旨飭催臣等督軍回顧
北路彼時剿捻正在喫緊勢難速撤當派恆齡蘇克金先後帶隊
馳回直東剿辦聞河北一帶不獨賊勢披猖團練亦多跋扈曾屬
蘇克金恆齡隨時察訪四月十五日蘇克金因前次札調帶隊到
營臣等面詢直東豫三省情形據稱各股匪徒雖被剿殆盡而伏
莽尙多團練尤爲兇惡前過德州已爲地方官及團練阻滯嗣至
故城境內復被團練擁眾攔截多方曉諭執意不聽且敢開放槍
礮致傷官兵多名不得已齊隊衝壓始行退回該員詢之鄉人賊
匪由此經過時團練曾否截殺據云閉門未曾出擊其爲縱賊阻
兵已可概見該員向督臣劉長佑述及該督亦言洋槍隊追賊時

曾被攔阻等語除飭蘇克金及參領常山保仍帶隊馳回河閒駐紮以顧北面藩籬外臣等伏思直東團練如此惡劣降眾如此叵測伏莽又如此之多實屬腹心之患匪首楊朋嶺於咸豐十一年冬間曾經投誠旋即叛去今被勦勢窮又復乞降似此反覆無常終遺後患且素與宋憬詩同類相契難保不聯爲黨與乘機倡亂應請飭下劉長佑實力清查如有賊匪餘黨及惡劣團練一律懾以兵威從嚴勦辦不可再蹈故轍一味羈縻即使不逞之徒被拏聚眾蘇克金恆齡等馬隊亦足合力殲除總之痛加勦洗之後庶民知畏法方可日久相安否則大兵一經南下勢必仍肆鳴張肘腋之患豈堪設想至於苗沛霖復叛戕官踞城自應聲罪致討然勦苗與勦捻不同不得不謀定後戰查苗沛霖從前帶練勦賊頗經戰陣且素以小仁小惠固結練眾悉成死黨兼之陰謀詭計狡

猶異常非擒匪專事擄掠者可比臣等督軍南下必先直東穩固無後顧之憂且須仍帶馬步全隊豫籌餉源糧草計出萬全始可一意進剿今直東情形既在在堪虞淄川白蓮池又負固未下各軍勢難遽行抽調此臣等再四籌畫未敢卽行南下之實在情形也淄川踞匪見經臣等督飭兵勇四面圍困用礮轟擊該匪人數不過二三千名惟城中糧食尙足是以併力死守毫無驚惶臣等雖嚴督進攻但兵少勇多恐難深恃儻該逆情急出竄惟有飭馬隊實力追剿其竄匪張守義一股經翼長舒通額等由寶泉山跟蹤進剿四月初六日追至費縣九女關復將該逆擊敗又追殺二十餘里殲斃馬步賊匪一千五六百名餘匪竄入白蓮池山內該處教匪復勾結擒匪李城棍匪劉雙印等股爲數愈眾其勢愈張臣等已飭舒通額等帶領馬隊駐紮曲阜會合駐紮鄒郡之步隊

探明路徑實力攻剿劉長佑奏欽奉諭旨命臣督辦直隸山東河南三省交界地方剿匪事宜伏查直東豫三省交界之區當以黃河爲限自咸豐三年髮逆竄越後無不以防河爲急務直省大名所轄之長垣開州東明等處南接蘭考東連濮范在在均須嚴防前曾設有官兵一千名練勇一千五百名如果統帶得人足資防禦至豫省彰衛懷三府向有河北鎮道專司巡防內黃滑濬各縣與大名最爲切近其地向多土匪大名道祝塏於河南情形較熟擬卽派令前往會同河北鎮道督飭各屬集團練兵期於緩急有備若東省之曹州緊與東明毗連久爲奸徒淵藪東昌所屬之莘冠堂邑館陶以及臨清邱縣一帶匪黨林立因而直省之廣平曲周清河等處多被煽惑故必山東安而後畿輔始安臣到營以來節經親督諸軍痛加剿洗張玉懷王恩第先後伏誅所難者南北

蔓延十餘州縣伏莽尚多勢不能盡殺乃止兼之降卒叛將雜處其間宋憬詩之包藏禍心尤爲東直切膚之憂日盼僧格林沁來直山東撫臣閻敬銘到任冀可熟商機宜併力收拾爲一勞永逸之策今僧格林沁旣返旆南征閻敬銘又前赴淄川不遑西顧刻下東省邊境應剿應撫及一切善後事宜急須閻敬銘遴委文武明幹大員前來實力整頓臣一面飭委臬司王榕吉前往會辦庶可早就廓清署提臣恆齡見往臨清暫示鎮壓一俟直境布置就緒臣卽親身周歷直東豫三省交界各郡縣查看情形相度緩急隨時妥辦上諭議政王軍機大臣等直東各股賊匪雖經被剿殆盡而伏莽尚多且各處團練率多兇惡前此蘇克金帶兵路過德州故城等處竟被團練攔阻卽直省派出追賊之洋槍隊亦曾被團練攔截至賊匪由該團經過但閉門自守並不出擊團練之

設原以助兵力所不及似此縱賊阻兵有名無實若不從嚴懲辦必致貽患無窮劉長佑閭敬銘身任封圻責無旁貸著卽嚴飭所屬實力清查如有賊匪餘黨及惡劣團練縱賊阻兵者卽咨會僧格林沁督飭蘇克金恆齡等馬隊盡力剿除毋稍姑息楊朋嶺誘擒張玉懷已降旨免其治罪此等匪徒屢降屢叛且素與宋憬詩相契難保不暗中勾結仍著劉長佑隨時密察如再有反覆卽按照辦理王恩第之法立正典刑勿得以受撫在先稍涉瞻徇其程順書等降股諒該督亦必自有辦法僧格林沁所陳南北軍務情形慮及直東不靖大局堪虞自是老成之見惟苗沛霖蓄謀已久勢甚鴟張若不及早翦除任令句合髮捻將來盤踞愈久根柢愈固剿辦更難著手且見在唐訓方止能力顧東路利在速戰而苗逆知我餉絀計圖坐困李續宜因病難卽赴皖壽州一路未知鮑

超能否赴援情形萬分危急僧格林沁自應仍遵前旨將淄川圍剿事宜交閻敬銘妥爲經理俟布置已有端緒各營扼紮穩固該大臣卽返旆南征行抵蒙亳酌量進止殄除巨憝劉長佑所奏豫省之內黃滑潞等縣與大名最爲切近該處素多土匪見派大名道祝塏前往會同河北鎮道妥辦卽著張之萬速飭該鎮道督飭各屬集團練兵以期緩急可恃其與直省毗連之東昌臨清等州縣匪巢林立降卒叛將雜處其閒必須直東兩省會商籌辦方免彼此歧異閻敬銘見赴淄川不克親臨邊境著卽遴委文武明幹大員會同王榕吉將應剿應撫及一切善後事宜實力整頓毋誤事機劉長佑仍當不時親歷三省交界各州縣體察妥籌如有不稱職之文武隨時咨商各該撫分別查參更換俾疆圉一律肅清方爲不負委任將此由六百里各諭令知之○諭前因苗沛霖叛

迹昭著諭令僧格林沁統兵南下茲據該親王奏稱恐督軍深入糧餉缺乏甚爲可慮請暫緩南行等語見在皖北髮捻各逆交乘曾國藩所統各軍已有接應不暇之勢若再任苗逆得以旬結肆擾則皖事愈難措手唐訓方以飢軍支持於兩淮之間情形甚屬急迫歷據該撫請飭僧格林沁南下亦因待援孔亟得以及早蒞事本日仍催令該親王南行惟僧格林沁餉需向由山東等省籌撥設大軍深入而餉需不繼亦甚可慮著曾國藩悉心籌酌或能於鹽課等欸項下遇僧格林沁餉項缺乏之時就近接濟唐訓方酌飭地方官豫備糧草以供支用俾該親王於抵皖後無後顧之憂方能一意攻剿該大臣等營餉項短絀朝廷本所深悉第苗逆一日不除則於該大臣等辦理軍務諸多牽掣曾國藩等身任地方自能和衷商辦也將此由六百里各諭令知之○諭張凱嵩奏

容縣逆匪盤踞遶員統兵進剿暨陣斬首逆吳凌雲攻克隴羅老巢各一摺匪首范亞音盤踞容縣蔓延岑溪素與陳金缸狼狽相依茲復勾結信宜匪黨竄入北流縣境勢甚猖獗雖經官弁紳團痛加剿洗北流一律肅清而餘匪遁回容縣老巢是范逆一日不除卽時時防其回竄且與高州陳金缸逆匪東西接壤若不急圖殄除勢必此擊彼竄於潯州大軍後路尤多牽掣之虞蔣澤春一員本日業經降旨開柳州府知府之缺以道員候補著張凱嵩卽飭該道員統領各營剋期出省督同該地方官及紳團相機剿辦並檄令各路兵勇會集紳團四面兜圍務將首要各匪悉數殲滅以除巨患其梧州一路卽照張凱嵩所擬嚴飭署知府趙元模調派兵練四面兜圍毋令竄越隴羅老巢雖經攻克吳凌雲亦經殲斃而逆子吳亞終尙恐乘閒脫逃致令死灰復燃仍著督飭吳德

徵等激勵兵弁嚴密搜捕毋畱餘孽范陳二逆既已聯爲一氣如

能將陳逆殲除則范逆之勢自孤著晏端書等仍遵前旨鼓勵各

營兵勇將高州股匪迅速撲滅崑壽疊奉諭旨前往剿辦此時計

已出省卽著該提督迅飭卓興等乘銳進攻與廣西官軍聯絡聲

勢互相夾擊將高梧一帶各股匪次第掃蕩淨絕根株以清邊圉

將此由五百里各諭令知之○以厲雲官爲湖北布政使

由荆宜施道遷

武蔚文爲湖北按察使

由督糧道遷

○予直隸陣亡道員秦聚奎建祠

知縣蒯遐齡祭葬世職○丙申 上詣 大高殿祈雨○諭議政

王軍機大臣等閻敬銘奏赴淄日期並防剿各匪情形一摺淄川

挑挖長濠計可完竣僧格林沁見擬製造攻具剋期進攻惟皖北

鳳陽壽州等處苗逆鴟張唐訓方兵單餉缺情形萬分危急疊經

寄諭僧格林沁移軍南旋並令閻敬銘速赴淄營接辦軍務俾僧

格林沁得以及早赴皖今該署撫已定期起程卽於行抵淄川後會商僧格林沁辦理淄營兵少勇多未能恪守紀律閭敬銘務當嚴申號令以振軍心城內賊糧甚多勢難待其自斃致稽時日僧格林沁諒已將攻剿事宜布置妥協閭敬銘接辦後卽可設法進攻以期早拔堅城直隸東竄股匪擾及夏津莘冠陽穀等處偷渡運河在聊城往平東阿一帶游弋此股敗殘餘匪爲數無多閭敬銘見已分飭保德及守備張大富分投截擊並咨恆齡探蹤追躡著卽督飭各路兵勇並地方鄉團四面兜剿務期悉數殲除毋任餘燼復然再行滋蔓至捻棍教各匪分途出竄擾及泰安兗沂各府屬州縣地方蔓延愈廣亟宜調集兵團分路扼截著閭敬銘卽嚴飭各地方文武認真防剿並督令恩錫迅籌進攻以期力掃兇鋒毋許因循延誤將此由五百里諭令知之○諭官文嚴樹森奏

竄鄂捻股暫時肅清忠逆大股及苗沛霖黨均圖犯鄂境見籌布
置情形一摺所奏豫捻一股屢經挫敗竄回河南光山羅山等境
皖捻一股被剿由廣濟黃梅竄走安徽之宿松縣境官文等令提
督成大吉由蕪水鼓行而東跟蹤追躡並檄總兵穆正春所部馳
紮英蘄之間相機會剿曾國藩前奏由廬江西竄之髮逆與由潛
泰東竄之捻股已在桐城地方會合由舒城竄圍六安勢甚兇猛
並有捻股已至霍山縣境按獲忠逆僞文所稱僞酋股數甚多計
欲分黨牽掣皖軍而自率悍賊由舒六英霍疾趨湖北麻城宋埠
一帶分犯漢黃窺伺荆襄與竄陝之陳玉城餘黨聯成一片逆謀
兇狡適值苗沛霖復行叛亂偏處鄂邊與髮捻勾結肆擾鄂省爲
南北樞紐自應力籌防剿以圖萬全曾國藩見調鮑超蕭慶衍等
軍由廬舒進以解六安之圍令道員李榕一軍由潛山進以擊霍

山之捻並令成大吉回顧鄂疆彭玉麟楊岳斌所部各派水師赴鄂協同防剿官文等見飭穆正春自巴河抽出所部前赴英山會合皖軍以剿爲防而令副將王桐柏率所部駐上巴河等處成大吉扼紫岐亭舒保馬隊作爲游兵馳驟其閒並羅麻等界之松子長嶺二關兩路口應山隨州棗陽樊等處各派防兵與內河分防武漢巴河等處分段巡邏及專防黃郡各水師均尙布置周妥曾國藩所派之水師王吉一軍卽分列陽邏至漢口一帶江面豫爲策應之兵羣逆當不得肆其衝突卽著官文等督飭水陸各軍嚴密設防賊如犯鄂臨時相機聯絡接應毋稍疏虞致令闖入嚴樹森仍自巴河回駐團風該處與巴河緊接尤爲扼要卽著隨時妥爲調度固守鄂疆以副委任皖省羣醜接連逆氛甚惡苗逆之勢復張僧格林沁自東省移師南下到尙需時卽抵皖境亦應由

蒙毫一路節節進剿其六安舒桐蔓連英霍一帶賊氛仍著曾國藩唐訓方迅籌剿擊賊如犯鄂曾國藩卽飛飭各軍緊躡與鄂省諸軍前後合力夾擊其李雲麟之軍見守棗陽一時不能赴陝而陝南軍務極緊見在髮逆狡謀又有欲由襄漢句連之信興漢賊氛尤應及早掃除前諭駱秉章飭周達武一軍由川赴陝仍著懷遵疊次諭旨飛飭該總兵拔隊星馳迅往漢南以資剿辦李桓自報由湘起程許久未接中途奏報見已行抵何處卽著星速前赴漢中督率辦理毋稍稽延覽官文等所奏豫捻被剿竄回光羅等境方以未見豫軍截剿爲疑正在寄諭閒張之萬等奏到截剿回竄捻匪總兵余際昌遇伏陣亡等摺片覽奏殊堪悼惜豫軍驟失此將精銳折耗亟應收合拊循以冀軍聲復振著張之萬卽飭張曜暫行統攝余際昌所部招集散亡加意撫綏並與鄂軍隨時聯

絡安籌防剿此時豫省惟張曜一人勢不能敷調遣毛昶熙軍營副將程祿興參將尹嘉賓勇略如何著張之萬毛昶熙於該二員中酌量任使金國琛一員前經諭令毛鴻賓飭令赴豫本日復寄諭該撫督飭起行一俟到豫卽責令帶兵防剿以資得力將此由六百里諭知官文嚴樹森曾國藩唐訓方駱秉章張之萬毛昶熙並傳諭李桓知之○諭本日據張之萬奏鄂省捻股回竄總兵余際昌等陣亡並片奏前調之金國琛等均因事牽掣未及來營等語豫省軍務孔亟將領乏人見在張岡之逆尙未剿除捻氛復由鄂回竄官軍敗衄兇燄甚爲猖獗而苗逆耽耽淮上歸陳一帶防剿綦嚴河北三府復以直東股匪未淨時虞豕突金國琛以奉旨飭赴豫省差遣之員豈容稍涉遷延致誤軍事著毛鴻賓迅遵前旨飭令該員迅赴河南軍營聽候張之萬差委毋稍逗遛致干咎

戾昨據李績宜奏行抵湘鄉患病未能前進請開署撫之缺俟稍痊赴皖等語業經明降諭旨准其所請惟皖省疆事孔亟非唐訓方一人之力所能支著毛鴻賓行知該前撫儻病勢稍痊卽當迅速起程赴皖以副委任毋得以既准開缺便可優游事外朝廷之於該前撫曲體下情無微不至該前撫亦當感激奮發以圖報稱也將此由六百里諭令知之○予河南陣亡總兵官余際昌三代正一品封典入祀昭忠祠並祭葬世職建祠陣亡遊擊李廷標祭葬世職附祀○丁酉曾國藩左宗棠沈葆楨奏自徽休解嚴漁亭獲勝後羣賊嘯聚黟縣祁門圖竄浮景以擾江西僞堵王黃汶金僞祐王李遠繼等句結太平石埭賴古兩逆由建德過新安嶺至太白鋪渚口等處逼近祁門西路黟縣之賊亦時擾祁門東路王文瑞以賊氛四逼當將駐防漁亭之總兵丁長勝等調回祁門並

由王沐派營赴祁門助剿三月初十日賊蹤緊逼祁門西路之千佛橋小路口一帶距城僅十里次日王文瑞督隊迎剿行至七里橋遇賊羈斃十餘名賊始敗走追至小路口賊復以大股回拒官軍猛擊數次斃賊千餘賊死拒不退喻勝榮匹馬陷陣身受矛傷哨長彭友年裹創力戰陣亡官軍益加憤怒左右兩路齊出奮力衝殺賊乃大潰官軍四面蹙之殲斃殆盡後股之賊紛紛竄走楊海泰等繞出千佛橋迎擊又斃賊無算計是役共斃賊七八千名生擒八百六十五名奪獲偽印三百餘顆羸馬二百餘匹據生擒賊供首逆偽祐王李遠繼已被官軍陣斬並殲斃賊目甚多其劉典一軍將徽州北路肅清後卽飭黃少春等七營進剿休甯北路藍田之賊斬馘百餘名次日進剿小溪之賊又斬馘數十名十四日王沐因賊由黟西竄至橫路枌木嶺一帶漁亭赴祁門道路梗

阻遂率所部轉戰而前又斃賊三百名而該逆大股仍踞黟縣城內自黟西至祁門東北折而至祁門南境均爲賊踞王文瑞將丁長勝等調回祁門漁亭僅王沐一軍駐守頗形單薄劉典卽飭黃少春等各營進紮漁亭張聲恆齊蘭禮移紮九輦橋十六日劉典至漁亭瞭見黟境四五八九等都賊蹤已滿其黟縣至漁亭大路又設一卡以阻我師當於十七日偕黃少春王沐分三路齊進甫近卡邊該逆出黨千餘王沐奮擊卻之劉典卽督軍過河將賊卡平毀而城賊及左右村莊之賊大至眾約數萬蠡擁而前適黃少春從左路沿岸而下中右兩路一齊猛進賊勢大潰劉典遂令黃少春由左路攻四五都之賊王沐由右路攻八九都之賊劉典率黃有功等追至黟縣城下乘勢奪門而入賊由東門竄走其時左右兩路已將四五八九都之賊剿除小溪一帶有賊千餘來撲經

張聲恆擊敗悉向羊棧嶺方干嶺逃去計共斃賊四五千名十九日王沐進紮黟城右山劉典派朱明亮等三營助之築壘未畢該逆大隊來撲王沐等奮擊斃賊多名該逆又分路來犯王沐等督隊猛進賊敗而復回官軍勢幾不支黃少春等繞後擊之賊始駭奔追殺數百名據生擒賊供該逆圖竄嶺內者因太平古逆扼其去路必欲噉各逆竄越江西並約騎賊前來助戰而另分大股偷渡徽休以撓官軍後路二十四日劉典知黟縣之黃村廬村等處賊已築壘勢將久踞遂率軍進剿該逆併力出拒左路黃少春等擊破一壘李良平復降其二百餘人中右兩路之賊來援王沐等繞出其後賊大敗狂奔陣斬詢天義等悍賊多名黃少春追至羊棧嶺賊分向嶺外竄去計破賊壘二十一座斃賊近二千名二十六日有零股回竄又約斃三百餘名生擒僞主將林逆磔之惟據

道員段起緘稱池建之賊已竄過石門距景德鎮僅七十餘里青陽等處之賊亦併圖上竄饒景戒嚴劉典擬畱王沐防守黟縣自率全軍赴浮梁助剿又據王沐稟稱賊蹤尙環伺嶺外劉典未便移軍入江如果太平石埭之賊全股竄江自當越皖赴江以符原議等語查該逆由廣德分竄皖南蔓延愈廣浙東敗賊復竄入合股其圍繞徽州休甯者意在闖越婺源以入江西之德興樂平其竄踞黟縣圍繞祁門者意在闖越浮景之東以出德興樂平之間而鈔浮梁景德之後此次官軍肅清歙休進剿黟縣嚴守祁門前後斃賊二萬數千之多劉典身先士卒屢瀕險危應先開列請獎以昭激勸其餘出力員弁容臣等查明酌保陣亡員弁並懇飭部議卹上諭議政王軍機大臣等池建青陽等處之賊併圖上竄饒景戒嚴王沐回援江境而黟縣無兵畱防賊蹤尙環伺嶺外徽

休一帶空虛又虞闌入劉典自未便移軍入江致有顧此失彼之慮左宗棠以該逆糾合大股由廣德分竄皖南蔓延愈廣浙東敗賊復竄入合股其圖竄徽休者意將闖越婺源以入江西之德興樂平竄踞黟縣圍繞祁門者意在闖越浮景東出德興樂平之間而鈔浮梁景德之後鬼域情形瞭然如見江西饒信之防沈葆楨辦理尙屬周妥左宗棠督飭劉典等軍與江省之軍聯絡一氣江皖之間羣醜諒不得肆其衝突仍著該督撫妥爲辦理惟念嶺外逆黨尙多窺伺青陽石埭建德東流俱有賊蹤安慶省城隔江南岸烽火相望曾國藩見駐皖省爲中權扼要其北自巢含舒桐以至英霍一帶賊氛密布髮捻交乘又值苗沛霖復叛皖北潁壽六安逆練紛紛撲擾兇醜頓張金陵逆黨自九洑洲渡江北岸聲言就食不卽擾及裏下河等處而直上和含且與苗捻各匪均相勾

結殊恐賊之蓄謀故爲此包鈔大舉勢將圍襄安慶以解金陵之圍曾國荃之軍偏城而陣不能速撤計曾國藩所部桐舒守將僅能自固惟蕭慶衍毛有銘等軍翼蔽最爲切近鮑超一枝勁旅往來策應兵力已不甚厚昨據官文嚴樹森奏報鄂疆疊警曾國藩已調鮑超等軍由廬舒進解六安之圍並令李榕一軍由潛山進以擊霍山之捻分派水師赴鄂協同防剿自係顧全大局卽以固鄂爲固皖之計第慮逆謀陰狡其南北兩岸分路圖犯江鄂逆黨均難保非聲東擊西詭謀雖兩省之防皆我所必救勢斷不能置而不顧而賊得乘皖省兵分備單之際麤集羣醜四面圍逼以恣狡圖該大臣駐紮江潯實爲東南全局所繫安危南顧彌增廛念曾國藩識略素優當茲搢拄艱難務宜倍加謹慎以策萬全左宗棠浙軍近日甚爲得手其不急取杭城而先清皖境洵屬老謀此

時刻與等軍在甯屬一路能否與蕪湖金柱關等處聯絡皖省相爲一氣或於克復富陽後卽移得勝諸軍由於潛昌化進攻廣德以圖東壩與曾國荃偪攻金陵之師可期前後夾攻擣賊老巢較之圖取蘇杭其策較勝而效當稍捷也著曾國藩左宗棠隨時會商妥籌辦理曾國荃之軍守局尙穩而兵力已單旦夕之間如有應行變動切要機宜亦卽酌量進止皖浙唇齒相依刻下皖事孔亟計惟浙軍尙屬切近左宗棠務與曾國藩聲息相聯總期緩急可爲接應不至扞格方爲妥善長江水師上下游聲勢尙壯其港汊紛歧處所有無逆黨潛藏飭令彭玉麟楊岳斌等加意巡邏毋稍疏忽九洑洲要害之地能否飭令水師乘閒攻擣如果此處得手則金陵城賊勢更窮蹙卽皖北羣醜歸路斷絕亦必亡魂喪膽剿辦更易爲力著曾國藩與曾國荃等隨時相機妥籌進取將此

由六百里各諭令知之○諭多隆阿奏統籌全局分路進剿一招據稱見在渭河迤南華渭俱無賊蹤臨潼之西僅有沙窩一處回巢渭河迤北高陵縣城尙被占踞涇陽三原咸陽等縣所屬地方匪巢林立剿辦尙非易此時東路得手恐該逆勢窮西竄三原一帶防務最關緊要雷正綰一軍未能撤赴鳳翔該將軍擬令專力固守嚴防北山西路一帶仍飭王夢麟統兵往救鳳翔不日大兵西指並令馬德昭一軍亦赴鳳郡鳳郡解圍再赴平涼並漢中近日情形請催李雲麟周達武兩軍俟李桓到漢南後分路剿辦又刻下進兵有三難難免遲滯等語所籌不爲無見雷正綰一軍防剿涇陽三原等處自未可輕易撤動致賊氛肆意蔓延惟鳳翔待援甚急王夢麟帶兵前往能否得力尙不可知且該員前經中途折回恐再蹈故轍必致貽誤著卽嚴催前進如兵力不敷由該將

軍等酌度調派甘肅賊多兵少亟盼馬德昭前往前已諭令該員俟多隆阿大軍西指省城稍鬆仍卽督兵赴慶陽與熙麟籌商何路緊急赴何路救援若先赴鳳翔恐又需時日馬德昭務卽趕緊赴甘不得遷延貽誤總兵曹克忠疏通省城糧道著瑛榮另撥數營交其統帶責令節節進剿將省城附近一帶匪巢迅速痛加剿洗以通糧運之路漢中髮逆分攻褒沔城固等城著飭帶兵文武及該地方官認真防守指日李桓到陝力加整頓昨據官文等奏髮捻交乘鄂邊緊急將李雲麟一軍暫行畱鄂俟軍務稍鬆方能赴陝已有旨准其暫行畱楚其周達武一軍昨已諭知駱秉章催令星速赴漢南一帶該將軍等卽派員催提令其扼要駐紮以資得力該將軍病未全愈將士疫氣仍重務須妥爲調攝曲加拊循以慰軫念至所稱日前攻破孝義卽飭潼商道趕備船隻迅速駛

至渭河以便搭造浮橋屢經嚴催尙未稟覆等語著多隆阿瑛棨再行嚴催如係有心玩誤卽從嚴參辦以儆玩泄德興阿一軍前經調令駐紮同朝一帶爲多隆阿後路聲援此時東路肅清該副都統一軍入駐同朝未免虛糜糧餉著多隆阿酌量調遣或令赴鳳翔救援或令赴西安省城一路會剿無得久置閒散以厚兵力見在蒲州防務亦鬆英桂所募之楚勇或可分撥若干派員統帶至同朝一帶駐防以資接替之處著多隆阿英桂會商辦理將此由六百里各諭令知之○以勞崇光爲雲貴總督降調兩廣總督○予湖北陣亡知府金雲門知州李棟建祠○戊戌諭內閣前因駱秉章覆奏遵查貴州提督田興恕先後被巡撫毛鴻賓御史華祝三參劾各款均屬有因當以該提督稟報軍情信用劣員肆行殘擾起造府第日事荒淫並有擅殺外國傳教及內地人民多命之事降

旨將該提督撤任飭令迅赴四川聽候崇實駱秉章查辦嗣因田興恕藉詞抱病抗不赴蜀復經諭令勞崇光張亮基馳赴貴州審辦見在張亮基已據報抵黔接篆勞崇光因沿途梗阻繞道前進計日亦當抵省田興恕著卽革職拏問交勞崇光張亮基按照被參各款及另案殺害無辜慘斃多命各節提同案內一千人證一併秉公嚴訊確情不准一字欺飾迅速按律定擬具奏○諭議政王軍機大臣等徐宗幹奏臺灣官軍獲勝抽調官兵援剿並防捕汀州府屬游匪各摺片吳鴻源一軍自嘉義解圍後掃蕩附近逆莊疊有斬擒斗六賊多敗遁官軍追至彰轄西螺一重溝等處曾玉明已由鹿港逼近彰城首逆戴萬生已竄回四張犁本莊餘逆仍扼踞死守曾元福見已出洋卽著督飭該鎮星速前進與曾玉明吳鴻源等軍合力進擊通判張世英調集番丁督率義勇直攻

四張翠將戴逆巢穴焚毀是該處丁壯尙爲可用著徐宗幹洪毓琛檄令張世英等激勵團丁乘勝接捕務將戴逆擒獲毋任漏網南路既無匪徒蠢動可無牽掣之慮見在大軍雲集兵力已厚著卽督飭各軍奮力合擊將彰化斗六次第克復毋稍延緩汀州府屬江廣游勇匪黨擾及歸化順昌等縣地方雖經鄉團擊敗仍恐各處游匪乘機竊發更難保非在逃之李阿四勾結滋擾自應乘其初起及早撲滅卽著檄飭參將吳連陞挑帶壯勇會同該地方官弁民團合力防捕迅圖殲除並將在逃之李阿四訪拏務獲以淨根株將此由四百里諭知徐宗幹並傳諭洪毓琛知之○諭前因駱秉章覆奏田興恕先後被參各款蹟均非無因並因田興恕殺害教民一案降旨撤去欽差大臣關防毋庸署理巡撫先行交部議處馳赴四川交駱秉章差遣並派勞崇光赴貴州查辦兼令

張亮基署理貴州巡撫會同崇實駱秉章將此案秉公辦理嗣因韓超屢次懇畱田興恕辦黔匪而張亮基勞崇光又均以道遠未能卽到致此案遲久未辦本日據總理各國事務衙門奏法國新到公使柏爾德密遞有照會等語田興恕處分前據兵部奏照溺職例議以革職因案未辦結尙未降旨其平日恃恩驕恣濫殺無辜實有應得之罪況天主教業已弛禁卽不得妄行殺戮且法國傳教人文乃耳又持有護照赴黔係屬按照條約前往田興恕身爲大員孟浪從事恣意妄爲已難辭咎張亮基業已抵黔接篆勞崇光昨已簡放雲貴總督計此時亦已行抵黔省卽著駐紮貴州先將教民一案迅速辦結其滇省一切情形並著隨時訪查奏聞再定進止勞崇光熟悉洋務兼能權衡輕重顧全大局且爲外國素所欽服張亮基遇事明敏果斷有爲該督等務當以國事爲

重不避嫌怨方爲不負委任田興恕被參各款業經駁秉章覆奏得實旣殺良團何斗山以致勒捐激變而又慘殺中外教民多命各案若不按照律例定擬稍有偏倚不獨無以服外國人之心亦無以平貴州士民之憤所有田興恕戴鹿芝等一千人證如何比照律例定擬之處及韓超捏詞保畱應查各件一併迅卽馳奏將此由六百里各密諭知之○廣湖南道州學額一名○己亥李鴻章奏太倉肅清後進攻崑山以程學啟一軍主之派開字奇字等營分紮東北兩門之間四月初三日程學啟督軍直逼城根城上悍賊拌死抗拒礮子往來如織我軍不能仰視賊卽乘勢由南門衝出欲襲我軍之後程學啟派隊迎剿該逆敗退入城旋探僞暮王城王等糾集大股數萬來崑援應初七日有賊萬餘復由南門繞東門兼至清陽江一帶程學啟派洋槍隊會同水師轟擊斃賊

百餘名賊仍向南門遁走復從北門衝出直撲開字新中營當令副將陳有昇等竭力堵禦該逆死拒營右高坡意欲築壘屯紮我軍轟斃黃衣賊目賊乃退回其援逆分股竄周市更樓橋等處副將宋有勝等擊之斃賊數百僞拱王一股復由北門搭造浮橋直抵開字營之前次日又由南北兩門衝出萬餘人分偏我營別出悍賊數千直撲開字新中營濠牆經各軍互相攻擊酣戰四時生擒及轟斃者不下二三千人賊始返奔畱守太倉之軍係李鶴章主之派督撫標各營紮毛家市橋建字各營紮杜家橋盛字營親兵紮雙鳳鎮以爲犄角之勢其八里橋小路另派遊擊衛汝貴築一小營扼守布置甫定四僞王糾眾約六七萬人欲攻太倉以解崑山之圍卽糾合大股圍撲盛字營周盛波憑牆固守一面抽隊繞過街西從後鈔擊該逆腹背受敵奪路狂奔遁回周市僞來王

率六七千眾徑撲親兵前營周盛波開礮擊斃紅衣黃衣賊目數十名賊復分隊圍撲盛宇副營並在街口修造石卡周盛波令周盛傳由雙鳳鎮之右孔昭佑由雙鳳鎮之左分路包鈔自帶親兵直入街內賊見我軍夾擊僞來王已中槍傷遂奪路而遁周盛傳等合力兜剿該逆人馬紛紛投水水爲不流李鶴章派副將吳建瀛伏於樹屋叢密處截殺百餘名與周盛波等合隊追至鴛鴦橋次日僞替王湘王率三萬餘眾由雙鳳鎮之右來撲親兵前營並由鎮北面四路環攻子如雨注周盛波等連開槍礮擊斃賊目十餘人賊猶死拒周盛傳自帶親兵伏於牆外木城排放洋槍擊斃無算孫善成水師復來會剿自辰至午過河之賊愈多周盛傳派隊乘船渡河將守橋之賊擊斃數百浮橋立即燒毀賊乃膽怯遁去其雙鳳鎮左之賊正在圍撲副營周壽昌帶隊衝進孔昭佑由

營衝出兩面合擊該逆退踞石橋周壽昌躍馬直入被槍打穿左
股猶裹創力戰適吳建瀛等趕到施放洋槍該逆龍旗大隊忽被
槍子擊動賊隊乃亂周盛傳等與援軍夾攻賊紛紛撤退是夜大
廟河川橋一帶賊卡復經知縣余思樞等襲破殺賊數百名又有
另股竄踞沙溪鎮分擾季家灣黃中元等乘夜出隊賊不及防倉
皇亂竄我軍追至沙溪該逆自相蹂踐港多路窄淹斃無數周盛
傳等亦由直塘以西跟追擒斬數百名諸僞王遁回崑山太境一
律肅清查該逆以崑山攻急糾合四五萬眾注意打破雙鳳鎮三
營直入嘉定以斷後路而解重圍其計甚爲兇狡賴將士用命得
以大挫兇鋒而援應崑山之賊復經各軍同時擊退城賊爲之奪
氣見在戈登備帶洋礮於初十日抵崑臣已飛飭各將弁等會商
妥辦又奏崑山北門援賊連營密布意在鈔擾我師十一日程學

啟派參將周良才等繞至更樓以襲該逆後路道員符信等進攻左路副將宋有勝等進攻右路程學啟自督遊擊陳忠德洋槍隊並攜帶開花礮四尊會剿天明直逼賊營該逆乘霧埋伏約三萬餘眾見我軍至伏賊突起勢甚兇猛當飭各軍分投迎擊並另派副將陽利見所部戰船夾攻水陸各軍連戰十餘合擒斬悍賊百餘名賊猶拌死抵拒戈登連放開花礮擊中多賊該逆大股稍卻程學啟飛令各軍乘勝進剿斬馘無算大股之賊始行狂奔立破賊營十餘座符信等三營由左路進擊宋有勝等三營由右路直攻復破賊營四座其餘各賊營亦多潰散周良才督率四營跟蹤追剿陽利見督率各船開礮環攻該逆奔逃無路半就擒誅計共殺斃賊匪萬餘名落水死者不計其數其破賊營二十四座奪獲旗幟器械三四千件餘匪不及入城望西遁竄我軍追過西門三

里許該逆外援受此大創賊喪膽已挑先鋒乘夜屯紮西門以備阻截一面飭令程學啟會同戈登併力攻打城池並飭李鶴章派隊由雙鳳進剿兩路夾攻迅克堅城 上諭議政王軍機大臣等都興阿等奏上下游水師續獲勝仗陸路嚴爲防範情形並咨明吳棠阻止李顯發來裏下河查辦匪徒吳棠奏髮逆由六安竄至盱眙督軍嚴防蔣壩等處李鴻章奏悍賊援應崑山竄犯太倉均經官軍擊退併力進攻崑城各摺片逆匪竄撲下游之諫壁大陰沙等處經都興阿等督飭賴鎮海等率領師船連獲勝仗其上游之浦口寶塔根馬步賊匪亦被梁正源等親率哨弁登岸擊卻防剿均尙認真見在太倉全境肅清崑山援賊疊被程學啟等水陸兩軍迎剿獲捷僞暮王等所築崑山城外營壘均經官軍蹋平戈登見帶外國礮火前抵崑山李鶴章復派隊由雙鳳進剿兩路

夾攻崑山之賊斷難久踞著李鴻章速飭程學啟等乘此聲威迅拔堅城以收破竹之效惟江陰一帶逆賊時圖北竄若崑山克復該逆窮蹙無依鉅險渡江尤意中事著都興阿富明阿嚴飭沿江水陸各軍加意防守不可以屢獲勝仗稍涉鬆懈髮逆捻逆合同苗練直犯定遠淮揚屬境防堵正當喫緊滁六一帶雖經李世忠布置防剿而該營兵勇不足深恃都興阿等於籠絡之中隱寓防範之意籌辦甚合機宜仍著該將軍等督飭各營將領嚴密戒備力保完區並著吳棠飛飭蔣壩衡陽高寶在防文武員弁認真扼截毋得稍有疏虞豫勝營兵勇屢赴裏下河滋事李世恆在逃尙未拏獲而李世忠復派李顯發前來查辦弁勇完善之區豈可令若輩無端紛擾吳棠並不據理阻止竟派副將袁世功會同辦理何不識事機一至於此著卽按照都興阿等咨會趕緊函商李世

忠務將李顯發迅速調回俾不至驚裏下河居民方爲妥善李世忠濫收句容降賊數百派赴江北防堵殊不可恃著都興阿富明阿吳棠隨時留心偵察防範毋稍大意將此由六百里各諭令知之○沈葆楨奏鄱境踞匪自三月二十五日經我軍痛剿後退屯高沙坂山背時出小隊窺探追之則不戰而退以誘我軍深入又因我軍有投誠免死之示逃出者均資遣回籍遂令悍賊五名詐降求充營勇希圖焚我賞糧軍火經韓進春訊出真情立予正法遣人焚積薪以誘之該逆望見煙起果蠶擁而來窺我營不動復狐疑而退智窮力竭勢將遁矣而石太古賴諸逆復句楊輔青由建德馳驟而來從石門東趨繞出陶溪渡之南分股西竄見在東至梘田街西至花橋賊蹤充斥昌江北岸蔓延百里韓進春以饒郡震動移營徐埠橋以截之段起王德榜派隊哨及梘田街雖小

有斬獲然賊勢如長蛇慮其旁襲仍收隊回浮景臣飛飭守備法
占雄劉效鵬帶忠勇軍左右營馳赴饒州歸韓進春調遣屈蟠帶
平江各營與夏耀藻之仁右營樂平縣之民團嚴扼昌江南岸與
浮景聯絡王沐之繼果營將抵浮梁席寶田之精毅營已抵臨江
計二十前後可抵饒防俟兵力較厚飭其會商進剿報聞○庚子
諭議政王軍機大臣等劉長佑奏蘆綱疲累請飭豫省將抽收鹽
釐停止一摺據稱長蘆商人連年以來交款繁重前經遮克敦布
在館陶抽釐合銀二錢上下已屬不支又經豫省委員赴龍王廟
等處抽釐每包制錢五百文計需銀四錢有奇薪水等項又需銀
一錢餘合計兩處每包需銀六七錢不啻增正課一倍見雖遮克
敦布館陶河岸釐卡業經停止而龍王廟抽釐局卡尙在請飭河
南一律停止等語長蘆商人因連年賊匪搶掠兼之河道淺阻不

能及時趕運以致銷誤課紕若再抽收鹽釐必致商力難支紛紛
倒歇於長蘆全局大有關係著張之萬卽將龍王廟等處鹽釐局
卡一律停止館陶河岸是否一律裁撤抑或仍有影射並著劉長
佑查明永遠禁止以恤商艱而裕國課原摺著鈔給張之萬閱看
將此各諭令知之○命釋回軍臺效力廢員○辛丑賜翁曾源等
二百人進士及第出身有差○唐訓方奏苗逆句合髮匪自六安
竄至鐘橋直逼定遠鳳陽一帶臨淮南北兩岸僅有四營若令拔
隊遠剿不特眾寡懸絕轉恐避實擊虛爲賊所乘臣再四籌維仍
令按兵不動嚴飭鳳陽府縣暨定遠縣督練堅守城池並飭道員
秦榮等親詣各圩諭其防守卡寨俟賊蹤逼近以副都統克蒙額
所部馬隊並敢死步卒爲游擊之師擘畫既定令營總勝安出西
路曹家店等處營總和善出南路總鋪一帶克蒙額出東路靠山

集而以總兵宋慶等軍先趨鳳陽多豎旗幟使賊知我有備別將
輕卒赴援田趙各圩該逆不虞官軍猝至望風奔逸我軍由總鋪
一帶追擊斬賊千數百名該逆併歸定遠將欲偪城爲營臣復添
派馬隊跟追至定遠北二三十里該逆列仗迎敵我軍從旁擊之
槍如雨下該逆首尾不能相顧紛紛南竄我軍乘勝擊斃千餘人
次日竄至張橋又爲參將吳開會邀擊斃賊數百名而臣部義字
三營自廬郡來援行至定遠東南之圓潭地方適與賊遇遊擊歐
陽勝美等各率所部分路衝突賊倉卒失措自相蹈藉而死者不
可勝數被脅逃散者亦以數千計其積年巨匪悉數南遁自必併
入巢縣而零星股匪分走定遠明光池河等處或繞盱眙或回江
浦臣飛咨吳棠嚴密防範尚可無虞查江北髮逆以數萬之眾麇
集六安忠酋初意原圖併犯湖北踞我完善之區乃爲苗逆所誘

入此絕地路無可休之舍野無可掠之糧

臣

復以馬步官兵及各

處團練四出擊之該逆窮無所逞悉數敗竄其骸大衰見在鳳陽定遠一律肅清臨淮復臻穩固所有在事出力員弁紳練可否容

臣

查明擇尤請獎之處出自

鴻慈

上諭議政王軍機大臣等

唐訓方奏擊退大股髮捻鳳定肅清一摺據稱苗逆句合髮捻數萬之眾分擾定遠鳳陽一帶經唐訓方飭令道員秦榮等督團防守副都統克蒙額等分道擊賊於鳳陽城外斃賊甚多遊擊歐陽勝美等自廬州來援各率所部分路衝突積年巨匪踉蹌南遁已飛咨吳棠等多發偵探嚴密防範等語髮捻並犯皖疆見經唐訓方派集兵練以剿爲防逆股悉數敗遁鳳陽定遠一律肅清臨淮復臻穩固洵屬調度有方深堪嘉尚所有尤爲出力之馬步兵練均准其擇尤保奏藉資策勵其張總愚程三程四老砍等股敗捻

繞由懷遠之考城下洪地方併入苗黨深恐兇燄更熾著該撫飭
令前敵各營實力剿防毋稍大意至匪眾南遁勢必遁入巢縣而
零星股匪分走定遠之明光池河等處或繞盱眙或回江浦俱不
可定著曾國藩都興阿富明阿吳棠嚴密偵探督令在防各將士
認真擊剿李世忠雖不能十分出力仍當暫爲羈縻俾爲我用並
著曾國藩等飭知該員固守地方遇賊卽擊勿任寇氛肆擾該逆
如犯江北都興阿等務當認真剿洗勿稍疏虞臨淮餉絀兵單唐
訓方前此擊敗苗逆此次復痛剿髮捻均已不遺餘力惟大敵屢
臨支持不易曾國藩素顧大局當妥爲兼顧以期得力吳棠近在
清淮兵力尙可分布並著隨時籌商調派不得稍分畛域僧格林
沁所派赴皖之馬步各隊當已漸次到營著唐訓方妥爲調度該
撫前已授爲安徽巡撫地方軍務責任綦重務須慎益加慎以保

皖疆將此由六百里各諭令知之○諭馮子材等奏蘇常巨逆復犯鎮防官軍獲勝情形一摺蘇浙敗匪屢思併力渡江北犯見經滬上官軍連下堅城進攻崑山勢將進取吳門蘇常江陰等處逆首避重就輕復犯鎮城東南兩路陸續糾黨屯聚孩溪諫壁及丹陽辛豐等處並有僞護侍兩逆會集十大酋謀於常州分十路出竄江防之舉經馮子材等督飭將士先將孩溪諫壁之賊擊敗並扼守丹徒鎮險要各營水陸官軍分路鏖戰復將紛搶渡河股匪擊退惟諫壁等處敗匪尙未遠遁散漫各鄉距鎮城不過二三十里丹陽辛豐等處之賊欲渡越河侵偏南路尙未擊退其丹徒搶渡之賊見在敗遁何處曾否退出鎮境亦未據該提督等奏及此次賊黨眾多較諸歷次犯鎮諸賊勢尤兇悍馮子材等務當加意慎重嚴密防剿將境內賊蹤迅速掃除毋任久踞致滋延蔓昨據

都興阿等奏稱水師堵剿諫壁等處賊匪獲勝各情與馮子材等所奏情形大略相同並著該提督等隨時知照都興阿等聯絡水師一體堵剿以資得力將此由六百里諭令知之○略秉章奏查興安鎮安兩城雖經收復髮逆偪攻漢中藩司毛震壽屢次進擊賊勢少卻而逆蹤蔓及沔縣甯羌其注意窺川已可概見且藍張兩逆仍踞洋縣是陝南賊一日未除不惟漢郡可危川北亦時虞紛竄臣查髮逆中旗一股自甯遠上竄由川西沿山急遁疊經各軍追擊勢已窮蹙乃接會理甯遠稟報石逆已擁眾渡金沙江竄至德昌河西禮州一帶圖犯腹地此路祇大渡河有險可扼而越嶲冕甯路徑紛歧皆可直達彼岸沿河三百餘里凡可渡之處皆須派兵扼堵且有僻境由沈邊土司地界渡河即可趨天全小徑以窺川西臣已調總兵唐友耕一軍并飭署雅州府知府蔡步鍾

募練二千名及木坪土兵四百五十名分布清溪以下渡口以扼越雋冕甯兩路其沈邊渡口則飭副將謝國泰調兵設防臣復飭提臣胡中和馳赴嘉定策應此川省西南分兵防剿之情形也髮逆李幅猷一股自雲南昭通分竄貴州之大定畢節見據敘永合江等廳縣稟報該逆已竄黔界之孤兒井毛台村等處皆距川境數十里臣度該逆與石逆分道而馳一則繞建昌以伺我不備一則突涪南以乘我不及其計誠爲兇狡臣已檄臬司劉嶽昭由高縣移營截剿以杜詭謀此川省東南分兵防剿之情形也敘郡爲川南適中門戶不惟滇黔土教各匪時圖侵擾且虞石逆及李幅猷等逆一經各軍擊退勢必復由雲南之東川鎮雄合窺敘南是敘郡之防不可一日稍疏臬司劉嶽昭所部移赴綦南臣卽調總兵何勝必蕭慶高等軍仍防敘南以期周密至川北則上至廣元

昭化下至城口太平在在與陝南毗連既經撥兵出剿斷難分段
駐師兵由此進賊由彼入道途相左回顧莫及鄰疆未見肅清本
境已遭蹂躪_臣再四籌度既不能不酌抽數營進援漢南更不得
不選留勁旅兼防川北伏查總兵周達武所部武字營舊部僅二
千名合之見募之一千名僅三千餘人畱爲川境要擊雕剿之師
見擬抽調駐防南江通江之道員張由庚所部三千二百人並添
調總兵朱桂秋所部二千二百人共五千餘名卽由南通出境先
剿漢中髮逆惟川中雖已撥兵而髮逆號稱十餘萬仍須湖北會
剿且須統帥得人方不至進止不齊_臣接江西藩司李桓自長沙
來稟約計三月中旬啟程取道湖北鄖襄前進到營尙需時日未
便懸兵以待見有湖北派防鄖西之鄖中李雲麟願率所部由襄
安約會川兵進剿_臣已飛咨湖北督撫_臣卽派李雲麟迅速會剿

並懇恩賞加李雲麟品秩較大虛銜俾得暫爲統帥其道員張由庚總兵朱桂秋悉聽其指授方略儻一戰而殲羣醜固屬至幸卽使先挫兇鋒得保漢郡以待李桓整旅而來亦不難次第削平前次擒獲奸細及逃出難民均有該逆垂涎蜀境意圖與石逆糾合之供見在川北防兵旣已抽撥出境川南之師萬難移動周達武一軍仍令暫紮昭廣一帶設賊由甯羌奔突可備堵截或賊由南通城太乘虛窺伺亦卽星馳雕剿此外尙有平武縣之喬莊等處與陝境之陽平關一帶接壤山徑叢雜周達武一軍殊難兼顧臣復調派護軍營二千餘名前往設防俾昭嚴密又奏查髮逆賴積新卽賴剝皮自貴州郎岱與石逆分路繞赴建昌意圖伺我不備迨退踞德昌裹脅煙匪不下三四萬人於正月二十六日復行上竄適值總兵朱桂秋已抵甯遠卽出隊迎擊殺斃二千餘人該逆

鈔小徑繞竄參將劉鶴齡追至禮州副將蕭祥勝帶隊行抵觀音巖賊眾來撲副將鄒成彪力戰陣亡適副將秦福益趕到朱桂秋亦督兵追及遂與劉鶴齡等合力攻剿賊始披靡退踞瀘沽我軍分路進剿斃賊甚多賊之前股已由冕山對河小路急竄直徧越高廳城經署同知周岐源等督率兵練堵禦斃賊二千餘名生擒賊供辨認賊屍內有逆首賴積新被土兵用石擊斃並有僞統領蕭袁二逆之屍該逆既無統率益復拌命狂奔竄至保安署都司趙仁接仗陣亡賊乃涉淺搶渡臣卽飛調總兵唐友耕由嘉定迎擊並派知府劉德謙馳赴邛雅復調總兵何勝必等相繼而進該逆已繞過清溪直奔榮經知縣孫怡祿帶團出禦因賊眾團單賊遂闌入縣治孫怡祿復調團進攻將縣城收復該逆竄入山徑道員鄂惠等督飭兵練分扼隘口維時護軍營已抵名山該逆不敢

由大道直窺雅郡由山徑旁竄天全知州丁雲章帶團扼守靈關賊已闌入州治丁雲章聞信趕回旋即克復總兵唐友耕由邛州先撥都司唐大有迎剿該逆被蘆山縣團練截擊竄至高家場不意我軍猝至乃反奔河場唐大有即於高家場築壘劉德謙亦由名山移紮夾門關以扼由浦江東竄之路該逆分撲唐大有營壘該都司督兵奮力擊剿斃賊五六百名三月初一日唐友耕親往接應正遇賊匪紛紛敗竄與唐大有前後夾擊該逆力不能支由石家山狂竄計斃賊三千餘名遂由大邑崇慶山內之新場懷遠鎮竄至溫江之何坪場蕭慶高兼程馳至該逆復旁竄郫縣之花園場朱桂秋又由雅州追及該逆不意到處有兵口夜急奔蕭慶高等因賊行甚疾催隊遄行及賊於彭縣之敖家場劉德謙等直前衝殺勇氣百倍復斃賊三千餘名拔出難民數千人賊向什邡

之李家礮逃竄何勝必時已先至什邡朱桂秋復由彭縣馳來賊
眾新敗不敢喘息急奔百餘里至德陽之孝泉甫思暫踞而何勝
必又督隊趕到朱桂秋亦自火燒堰截出合兵酣戰其斃賊千餘
人生擒二百餘名初十日追至羅江之略坪探知該逆已由慧覺
鋪竄至三臺縣之葫蘆溪蕭慶高等分道並進正值該逆渡河我
軍擊斃一千餘名餘賊向劉家河逃竄適知縣潘澤霖等管帶武
字營新募勇丁行抵梓潼卽向劉家河進發該逆甫經交鋒復由
宣化鋪竄去十四日及賊於江油之馬鞍寺參將何世華匹馬突
陣忽中洋槍兵勢稍卻蕭慶高率隊繼進賊仍由山徑逃竄十六
日追至馬閣賊已遁平武之雁門壩涼水井一帶由此以往悉皆
窮山僻徑我軍乏糧不能枵腹並進遂分朱桂秋一軍由雁門壩
按捕據生擒賊供僅餘數千人向山谷奔匿以圖苟延殘喘乃旋

接廣元昭化探報餘賊已由平武山內逃往甘省文縣邊界之畢口地方臣以此股殘匪未能殲諸本境殊深憤懣見復籌援漢南未便以此牽綴大兵度該逆必由略陽圖與甯羌之賊合股儻能分兵會剿陝南之賊並將此股殲除庶不至貽患鄰疆所有剿賊陣亡之參將張春圃等均請飭部從優議卹並查榮經天全皆於上年經藍逆攻陷城垣未及修築此次復被賊匪闌入知州丁雲章知縣孫怡祿雖未能防範於前旋即收復臣知愧奮應懇天恩將丁雲章孫怡祿革職暫行畱任副將秦華祝雖因中途患病不能親督前進以致該營挫失究難辭咎應請旨將秦華祝革職並撤去勇號以示懲儆此次逆賊狂竄一日夜行百數十里諸軍兼程追剿連戰皆捷不無微勞可否容臣查明擇尤獎敘上諭駱秉章奏籌辦會剿漢南逆匪一摺漢南軍務緊要疊經諭令川

楚撥兵援剿賂秉章以總兵周達武一軍所部新舊僅三千餘人
萬難獨剪巨寇已抽調駐防南江通江之道員張由庚及總兵朱
桂秋兩軍共五千餘名由南通出境先剿漢中之逆惟髮逆號稱
十餘萬仍須湖北分兵會剿且須統率多人方能濟事李桓到尙
需時請飭湖北調派李雲麟一軍馳赴漢南會剿等語陝省漢中
被圍已久城固褒沔偏地賊蹤鄰省援師豈容日久耽延致形滋
蔓李桓自報起程迄今尙無到陝消息前已傳諭該藩司迅速趨
行卽著懷遵前旨剋日兼程前進馳赴漢中相機剿辦李雲麟一
軍官文等前因髮逆圖犯鄂境飭令畱守棗陽暫緩赴陝見在該
省防堵事宜自己布置周妥其棗陽一路距皖省逆氛尙遠不妨
抽調到營駐紮以資鎮遏且川省援軍旣已出境若無鄂軍合力
夾擊終難聚殲著官文嚴樹森卽飭李雲麟迅率所部剋期出境

由興安取道西鄉與川中所派之兵會合兜剿毋稍宕延川省西
防髮逆東禦鄰氛堵剿情形亦與湖北相埒駱秉章尙能不分畛
域抽調赴援湖北以業經派赴漢南之軍豈可以防務綦嚴日久
扣置鄰疆於不顧官文等務當剋日調派一面將李雲麟起程
日期迅速馳奏以慰廑系本日復據張亮基奏黔省已保道員張
心培謝葆齡營私植黨股民召亂無惡不作見在密加訪拏已先
後遠颺等語著官文嚴樹森毛鴻賓速飭所屬該二員原籍地方
嚴密查拏解往貴州交張亮基審辦毋或疏縱將此由六百里諭
知官文嚴樹森毛鴻賓並傳諭李桓知之○諭駱秉章奏中旗髮
逆自甯遠上竄截剿獲勝並殲斃首逆一摺據稱髮逆自甯遠敗
竄天全等處隨處遇兵截剿賊首賴積新卽賴剝皮被殲僅畱餘
匪數千人乘閒奔逃旋據廣元昭化探報餘賊由平武山內逃往

甘省文縣邊界之畢口地方度該逆必由略陽圖與甯羌之賊合股等語見在駱秉章抽調駐防南江通江之道員張由庚所部三千二百人總兵朱桂秋所部二千二百人由南通出境剿辦漢中髮逆並請飭令郎中李雲麟督率所部由興安取道西鄉與川中所派之兵會合以剿爲防本日已諭令官文嚴樹森迅飭李雲麟前赴漢南協剿矣此次竄入甘省文縣之川匪必繞由略陽糾合甯羌踞賊若不力加擊剿甯羌匪勢益肆鴟張著瑛棨督飭帶兵文武及該地方官將圖竄略陽之殘匪認真接剿悉數殲除毋令與甯羌之賊勾結致辦理更形棘手張由庚等軍指日可到並著瑛棨嚴飭漢南各軍會合川兵相機攻剿不得專恃鄰境援兵任本省兵勇觀望退縮貽誤戎機川匪見既竄入甘省文縣未知復逸何處抑或卽擾略陽著熙麟一體派兵嚴加堵剿迅殄賊氛毋

令蔓延甘境將此由六百里諭知熙麟瑛棨並傳諭恩麟知之○諭駱秉章奏籌辦會剿漢南逆匪並截剿甯遠繞竄髮逆股匪遵覆見辦勸捐及本年續辦按糧津貼各摺片張亮基奏剿辦黃號苗教各匪及由川竄入滇黔境內髮逆覆陳籌辦教民案件林自清見尙安靜遵保遣散滇練各員等摺片均經覽悉又據福陞奏報雲南逆回突入省城戕害總督各官及探悉滇省見在情形各摺片所奏雲南省城被逆回突陷等情與駱秉章張亮基等前奏大略相同見在胡中和旣在川省帶兵剿賊而福陞尙駐滇省本日業將四川提督蔣玉龍所出之缺令胡中和調補福陞補授雲南提督該提督無論行抵何處卽行折回駐紮昭通與賈洪詔就近籌商將滇省應辦事宜妥爲籌辦以資得力川滇黔三省輔車相依滇省糜爛至於此極朝廷豈忍坐視不爲之所惟黔中見未

肅清該省地方本來力薄川省較爲殷厚近來亦已疊遭蹂躪石逆等股匪尙肆擾沿邊其與陝南毗連興漢褒斜一路軍務尤殷亟須蜀兵越境會剿前經疊次寄諭駱秉章催令周達武一軍赴陝茲據奏稱周達武所部兵力尙單畱爲本省雕剿之軍方期得力見已派令道員張由庚總兵朱桂秋各領所部兵勇合五千餘人由南通出境越期漢中之賊卽著督催張由庚等星速前往李桓見在中途約計不日當可到陝見復寄諭飛催並諭官文嚴樹森飭令李雲麟之軍仍卽赴陝該員前爲官文等奏畱駐防鄖棗刻下鄂邊賊勢稍紓當可移師西向駱秉章所請量加階秩俾資統率之處應俟李雲麟行抵漢中再爲酌辦其甯遠等處被剿由平武山內逃往甘省文縣邊界餘匪如由略陽與甯羌之賊串合張由庚等軍馳赴陝南卽可並將此賊聚殲著駱秉章飭令該道

員等探悉賊蹤相機剿辦其川省東南之劉嶽昭軍西南之胡中和唐友耕等軍布置均尙周妥敘南所駐之何勝必一軍川北一帶所留之周達武一軍均著督飭嚴密防剿保全四境川省見辦勸捐及續辦本年按糧津貼均著照所擬辦理石逆一股游弋川黔等省各邊已久此賊起自廣西最爲頑惡流轉東南各省見復擁眾以渡金沙分擾川滇接壤境地賂秉章與勞崇光張亮基等務宜隨時相機飭令各邊將士設法將此賊擒戮毋任蔓延黔省教民案件疊經寄諭勞崇光張亮基妥速籌辦此時勞崇光計當抵黔省卽懷遵前日密寄諭旨與張亮基迅籌辦結以服遠人而靖地方毋稍延緩田興恕已起程赴川仍卽飭令折回黔省聽候辦理如已抵川卽著賂秉章派員押解回黔張心培謝葆齡二員尤爲惡劣爲田興恕叢咎所由豈容遠颺逍遙法外並著賂秉章

嚴密查拏其各本籍地方亦經寄諭官文等一體嚴拏解黔歸案
戴鹿芝趙畧三多文均經分別摘頂撤任卽著將該員等先行查
辦敎民一案關繫緊要前次寄諭甚詳諒勞崇光張亮基必能悉
心體察妥爲商辦以期息事也林自清回黔見尙安靜張亮基所
奏令其暫爲韜晦磨鍊再行任使所見甚是勞崇光抵黔後自應
暫行駐紮將滇省事宜如何籌辦之處妥籌具奏賈洪詔何日前
赴昭通察看昭東地方能否進籌戰守茲閱福陞所奏六難六易
等情於漢回一切情形殊有所見此時能否照該提督所擬辦理
著勞崇光賈洪詔悉心籌畫斷不可稍有漏洩先致播揚福陞原
片著鈔給賂秉章勞崇光賈洪詔閱看至髮逆由川入滇竄撲昭
通府城福陞督率地方禦擊獲勝等情並著該督撫等查明如果
實有出力員弁兵練據實保奏滇省辦理勦撫一切事宜亟須籌

畫餉需張亮基前奏曾於廣東湖南等省籌備雲南軍餉又於四川重慶瀘州分立捐局亦爲雲南軍餉而設共有銀數若干此時自應仍歸辦理雲南軍務之用著張亮基與勞崇光商同撥給昭通等處以應急需駱秉章前奏滇省情形總須川省事平力量寬裕始能認真舉辦洵屬老成之見第此時滇事決裂已不堪問僅餘東昭一隅之地尙可進步亦不能不及時籌辦該督素顧大局遇事不分畛域滇事如何著手如有應行接濟之處卽著駱秉章酌量緩急隨時撥解渝瀘二局見存捐款能否先行撥給亦卽妥籌可也將此由六百里各諭令知之○詔盛京刑部清釐積案○予四川陣亡副將鄒威彪貴州陣亡副將王國珍知縣秦安慶祭葬世職陝西殉難庶吉士邢景周建祠○壬寅諭議政王軍機大臣等熙麟奏回匪圍攻平涼府城援剿獲勝一摺回匪圍攻平涼

於城之東南東北兩處羈發地雷均經官紳兵民奮力搶護補築完竣此次又經馬天祥等援剿獲勝賊知有備當不至併力圍攻惟援兵太少雖獲小捷未挫兇鋒究不可恃著熙麟迅將前調延綏鎮兵催提到平以厚兵力仍嚴飭馬天祥等及總兵呂元知府田壽增就見有兵勇實力防剿毋稍疏虞至敗匪西竄係向何處遁逃平涼郡城曾否解圍熙麟摺內未經聲敘仍著詳晰查明迅速馳奏將此由六百里諭令知之○癸卯諭內閣前因多隆阿奏副都統祥恩寄頓勝保貲財該將軍派員往查祥恩輒將委員捆毆當經降旨將祥恩革職查鈔交多隆阿嚴訊復因僧格林沁呈出郎中何恩壽信函有道員戴鸞翔貪鄙奸詐逢惡助虐等語一併交多隆阿審訊經多隆阿奏請將該員革職歸案審辦嗣據多隆阿奏屢經研訊該二員堅不吐實因軍務方殷請解部嚴審復

經諭令將該二員就近押赴山西交愛仁王茂蔭秉公訊辦茲據
愛仁等奏稱查明祥恩等被參各款均訊無實據惟祥恩於協領
同慶等查起勝保寄物並不細詢來歷輒因口角細故將筆帖式
安成毆傷戴鸞翔奉委勸捐並不善爲經理因前任衛千總童維
卽童登魁書捐過少輒將其捆縛兩手交縣看押又因長安縣代
雇羸馱短少將縣役棍責實屬任性妄爲業已革職應毋庸議等
語已革副都統祥恩已革道員戴鸞翔久在勝保軍營最爲親信
該革員等非但不能匡正勝保復敢憑藉威勢肆行無忌雖被參
各款訊無實據而毆打委員捆押捐戶棍責縣役種種妄爲其平
日之倚勢作威已可概見况戴鸞翔未至勝保軍營以前久已聲
名狼籍以上二員僅予革職不足蔽辜祥恩戴鸞翔業經革職著
永不敘用均發往軍臺效力贖罪以昭炯戒○曾國藩奏自石澗

埠圍營之賊經水陸各軍合力剿退後進撲廬江分竄桐舒與由
鄂東下之捻聯爲一片僞忠王李秀城於三月初二日犯石澗埠
近逼我營該處將領毛有銘劉連捷等密飭士卒穩守營寨連日
賊眾數萬圍攻南後瑞左等營束草負板撲近濠邊毛有銘排礮
環擊殲其前鋒賊猶晝夜猛攻相持不下如是者數日初七日毛
有銘挑銳卒潛出濠外突焚積草劉連捷復派隊奮擊毀其攻具
賊爲少卻仍於營前營後增壘盈百層層合圍營中糧運俱絕如
是者又數日曾國荃在金陵聞警卽派彭毓橘率馬步八營倍道
而至彭玉麟亦調周萬倬等渡江來援遂與蕭慶衍會軍於黃落
河十六日彭玉麟親督水師進次海子口牽制東關一路遣死士
溷入石澗埠營中密約詰朝會戰是夜四更彭毓橘進攻釘子壩
皇圖寺各賊壘蕭慶衍周萬倬進攻黃龍岡迎珠塔各賊壘號礮

齊發毛有銘遂於重圍中衝出攻草鞵嶺之壘劉連捷出攻石澗
埠之卡王載駟等亦馳出擊賊於羊虎山見黃龍岡迎珠塔火光
突起知黃落河援軍得手卽乘勢猛進併力夾擊俘斬無算彭毓
橘亦自皇圖寺來會縱橫盪決羣壘悉平而東關賊援並爲水師
擊退忠酋各黨乃分向小嶺開城橋而遁臣所調鮑超北渡之師
十六日抵無爲州未及移營進剿聞賊已解圍而去擬回軍以踐
上援江西之約甫及登舟賊之另股竄盛家橋者偪犯廬江該城
有吳長慶等三營又截畱梁美材等三營分段繕守乘賊喘息未
定一擊卻之十五日王占魁出城雕剿又捷於羅家埠至十九日
忠酋大股自石澗埠而來悉萃廬江圍撲城池臣飛檄鮑超舍舟
登陸轉援廬江而廬江之賊復經吳長慶等偪隙出擊賊遂解圍
西竄梅心驛二十一日突攻舒城之西南兩門守舒城者爲安肅

道蔣凝學分軍迎勦賊退七里河是夜設伏誘賊大挫兇鋒擒僞
天將羽天福於陣維時捻逆張總愚髮逆馬融和等由豫而鄂而
皖間道疾馳足無停趾瞬息而至桐城守桐城者爲湖南提督周
寬世出戰於三里街凌厲無前賊眾大怖將謀宵遁我軍聯騎追
勦該逆遂往孔城鎮與忠酋合而爲一二十三日忠酋前隊衝至
六安州之十里鋪該州城大而圯畱守者祇有道員曾廣翼等數
人力籌守禦次日賊以大股繼至自東南迤北而西面面結壘軍
士守定垛口各以巨礮環轟曾不少卻賊乃分路來攻將抵城根
東門城垣久爲風雨所損猝傾六七丈一時塵土蔽空羣賊大呼
擁入王臨祥揮兵齊上抽刀攢刺擲屍城下曾廣翼袁秀林飛騎
繼至悉戮進口之賊搶築木城二道二十七日賊眾傾巢而出自
北城以至西城幾無寸隙其尤悍者挽盾直前誓以死搏我軍屹

立不動俟其躍過城濠拋擲火毬焚賊無數始各裹屍而退翼日
曾廣翼王臨祥見城南一二里外掩映賊旗徘徊不進乃令勇士
縋城馳擊斃賊數百名三十日又縋死士出襲鮑家圩擄糧之賊
斬偽富天豫張承得等並生擒偽左監議劉潮柱臣檄鮑超由廬
江往援檄劉連捷等由無爲州往援鮑超將至舒城賊遂解圍遁
往廬州一路臣查無爲州爲江北膏腴六安州爲皖鄂要衝忠酋
以全力圍撲石澗埠冀破無爲旋由廬江舒桐糾結捻股圖爭六
安其行蹤剽悍蓄謀兇狡諸將士苦籌戰守城營均獲保全使賊
不敢橫竄鄂疆均屬著有微勞相應開列清單先行懇恩獎敘其
陣亡之參將黃仁親都司趙人和守備蕭淇松劉紹志千總吳秀
高把總李大材毛昌五謝仁週外委李升山沈謙德向慎光董景
星應請飭部從優議卹又奏雨花臺金柱關蕪湖東西梁山各營

水陸穩固均無戰事甯國附近如南湖新河莊等處涇縣附近如
茂林章家渡等處俱有賊蹤游弋防務尙難鬆勁然甯郡及涇縣
南陵青陽名城灣沚及西河清弋江各隘水陸防守綦布星羅足
以仰慰宸廑徽郡防兵單薄是臣布置最疏之處去冬甯國之
賊今春浙東之賊見皆麇聚於石埭太平及徽祁饒景一帶實屬
防不勝防勦不勝勦幸左宗棠派劉典一軍沈葆楨派王沐一軍
會克黟縣大破近城盧村黃村之賊王文瑞亦將相溪金字牌零
股擊退黟祁境內甫靖羣氛而賊之竄往鄱陽者已由楓田街進
偏浮梁王沐將回駐景德鎮劉典將馳援饒景江西之門戶可虞
徽州之空虛尤爲可慮見調李榕一軍由北岸馳赴建德進援祁
門調席寶田一軍由湖南馳赴撫州進援徽境不知能否迅速趕
到僞忠王李秀城自六安州解圍下竄或稱其回救蘇州或稱其

圖犯揚州襄下河或稱其糾合苗黨竄擾濱淮各屬雖未得其確耗而悉數東趨並未西犯鄂疆卽屬大局之幸臣見檄鮑超由廬州追擊忠酋卽從柘皋進兵以攻巢縣之北劉連捷等分攻巢縣之東蔣凝學等進援壽州並調成大吉由鄂回皖會師壽州共討苗黨該州糧缺兵單再能固守半月各軍次第趕到兼得僧格林沁李續宜遵旨偕來誅屢叛之逆豎保長淮之重險庶足以彰天討而定人心李鴻章奏自我軍直逼崑山後僞暮王來王湖王等卽由蘇城糾集大股五六萬眾來援四月初七日南北兩門各出賊萬數千人我水陸各軍擊走之次日復出竄擾暮逆選悍賊踞月河橋前路經參將何安泰等殪賊多名另股數千人繞及更樓橋副將宋有勝等迎頭轟擊均卽敗退初九日復有萬數千賊由南北兩門而出分偪我營何安泰與各軍合力擊之斬首千餘級

該逆以我軍無隙可乘遂於北門一帶連紮賊營二十餘座十一日派周良才等繞襲賊之後路直抵更樓橋派遣員符信等張左右翼進自督親兵繼之先將伏賊擊敗戈登施放開花礮助攻當破其二十四營殺賊萬餘戈登卽欲攻城程學啟密覘地勢城西爲陽澄湖北爲巴城湖南爲青陽江其由崑山回蘇僅正義鎮爲陸路該處紮有賊營四座賊匪屯踞於此接應崑城我軍必先據其後路要隘使城賊膽落則其勢易破十二日因與戈登乘船由崑山南門繞赴正義開礮轟擊斃賊無算次日復率同總兵郭松林滕嗣武等直達正義該逆憑河拒戰當揮令各軍分投迎剿自督洋槍隊居中策應轟斃及殺斃之賊約二三千名副將陳東友等督水師前來助戰戈登李恆嵩繼至又斬賊三四百名其時暮逆等踞守崑山西門見我軍已紮正義退無所歸復率三四萬賊

直撲我營各軍會同水師開礮夾擊擒斬二三千名賊乃敗退入城郭松林等守住界口以阻該逆由蘇來援之路程學啟又飛飭周良才等於北門橋口扼紮三營以杜奔潰復飭何安泰等於東門外站隊分派既定時已昏暮聞崑山城下人聲鼎沸恐賊復來衝撲卽商令郭松林埋伏橋口成俞卿礮船攔河排列自督親兵扼紮正義大路果見暮逆等糾合大股由小西門拌死猛撲意在奪路狂奔因排列洋槍迎擊我軍伏兵四起呼聲震天水師礮船連環轟打賊不能支紛紛回竄斬殺傷斃者不可勝數隨飭各營按隊而進直抵城下當派劉士奇符信等攻南門周良才等攻北門巡湖水師於西門搭造浮橋礮船由水關潛進十四日遂將新陽崑山兩縣克復其守城各逆盡行剿除計共生擒悍賊七千餘人轟斃悍賊二三萬人訊據僞朝將夏添義供稱僞暮王譚紹洸

等昨夜逃出聞投陽澄湖而死據程學啟稟報前來洵足大快人心諸將士先後攻戰洵屬勞苦功多兵官戈登奮勇明白均應請旨褒獎以昭激勸 上諭議政王軍機大臣等逆酋李秀城率黨圍撲石澗埠營盤經毛有銘等會合彭玉麟水師併力夾擊蕩平賊壘立解重圍其竄撲廬江六安州等處之賊該文武員弁且守且戰屢獲勝仗賊遂解圍而遁剿辦尙屬得手惟僞忠酋自六安解圍下竄據都興阿等奏苗逆糾同髮逆詐稱數十萬已由滁州竄至天長之玉興集儀邑西北鄉居民紛紛震恐與曾國藩所奏或稱其圖犯揚州裏下河或稱其糾合苗黨竄擾濱淮各屬之語相合是其窺伺揚防圖竄裏下河一帶已無疑義見在淮揚兩郡防剿正當喫緊著都興阿富明阿嚴飭水陸各軍整肅隊伍相機迎剿並著吳棠仍遵前旨檄飭蔣壩衛陽高寶等處守將認真扼

截淮陽唇齒相依都興阿富明阿吳棠務當不分畛域互爲策應
力保完善之區俾該逆無隙可乘方爲妥善李顯發駐紮六合並
不力籌堵禦竟欲親往裏下河查辦游勇實屬不知緩急著曾國
藩速行札飭李世忠迅將李顯發調回固守六合毋稍疏懈並責
成李世忠就近調派勇隊遏截賊匪東竄之路毋得意存觀望自
取咎戾鮑超見由廬州追擊忠酋著卽飭令該提督會同劉連捷
等進攻巢縣迅拔堅城壽州糧缺兵單萬分危迫該大臣當嚴檄
蔣凝學等軍星夜馳援尅期趕到俾免疏虞格林沁見因圍攻
淄川功在垂成未便撤圍南下雖據該親王馳奏一俟淄川克復
卽督率全部回剿苗練而此軍何日可以南下究難豫定成大吉
業已由鄂旋皖計日可抵壽州該提督熟悉苗練情形著卽先行
檄飭成大吉蔣凝學毛有銘會師進討其蒙亳一帶並著唐訓方

督飭將弁妥籌援應毋稍大意李續宜已由水路北來行將抵鄂
該前撫受恩深重著曾國藩飛催前進迅速抵皖毋再遷延皖南
之賊時思竄擾江西雖經劉典王沐等軍埽除黟祁賊匪而賊之
竄往鄱陽者已由梘田街近徧浮梁且昨據沈葆楨奏建德踞賊
恨彭澤縣九都團練之悍以大股分路猛撲民團爲賊所乘退至
西河扼守見因饒防危急不能分兵往援是江省防務饒九均形
喫重曾國藩見調李榕一軍由北岸馳建德著卽酌度機宜將
此軍就近調赴彭澤攻剿竄匪俾該縣民團不至潰敗則士氣益
堅邊防可期穩固惟在該大臣酌量迅速辦理鎮江軍務昨據馮
子材具奏與都興阿所奏略同該將軍務當隨時嚴檄上下游水
師認真防範備豫不虞並咨會喬松年將沿江團練實力整頓以
壯聲勢正在寄諭聞據李鴻章馳奏克復崑山新陽縣城擒斬逆

匪殆盡一摺崑新一城爲蘇省東面切近門戶見經官軍剋期攻拔擒斬逆賊至數萬之多蘇城踞賊自必聞風喪膽且據曾國藩奏探悉忠酋有回救蘇城之說亟宜乘賊情惶恐之際迅速進攻著李鴻章督飭程學啟等速移得勝之師規取蘇城力圖克復俾渡江之賊回顧巢穴不敢肆意分竄則淮陽一帶防務可期稍鬆見在我軍乘勝之餘宜先由何路攻取最操勝算之處著該撫妥籌迅速辦理李鴻章另片奏請將俞斌所鈔家產發還變賣令其繳足罰欵等語著照所請所有鈔過俞斌產業准其發還勒令自行變賣將應繳之欵趕緊如數呈繳如繳不足數或任意遲延卽著從嚴參辦李鴻章請將新復之太倉等州縣漕糧豁免等語已特頒諭旨將本年漕糧一體豁免矣該州縣居民疊遭蹂躪困敝不堪全賴良有司加意拊循隨時安集並著曾國藩李鴻章慎選

牧令綏輯地方俾流民不至失所以副委任將此由六百里各諭令知之○以克復江蘇崑山新陽縣城賞總兵官程學啟一品封典○子江蘇被戕知府于滄儒安徽陣亡參將黃仁親等祭葬世職○甲辰 上復詣大高殿祈雨○乙巳諭議政王軍機大臣等穆騰阿瑛棨等奏擊退撲城回逆遵查省城見駐兵勇數目曹克忠見帶楚勇疏通糧道咨催雷正綰馳援鳳翔又歷陳漢南軍務請飭李桓自行奏事各摺片西安省城守緊要節經諭令穆騰阿瑛棨等妥籌儲豫自多隆阿攻克倉頭將由沙窩高陵一路勦擊分路並進省城尤應竭力固守使賊不得乘閒攻撲意圖牽掣本日據奏回逆復撲城營官軍擊走各情仍著穆騰阿瑛棨等督率城營兵勇實力巡防並籌戰守毋稍疏懈賊既廣造攻具計圖攻襲尤須嚴密防範設法破其奸謀俾不得逞至城內外旗綠各營

布置情形覽瑛榮開單及穆騰阿所奏均悉穆騰阿督率巡防各營兵親加操練務令精熟其補額幼丁等亦須隨時教練以資得力瑛榮所有城內外見存兵勇合之穆騰阿存營兵數如果布置得法調度有方與曹克忠之軍就近聯絡聲勢自當戰守兼施足敷鎮撫何得意存惟怯藉口兵單動成坐困之勢多隆阿大兵不日西指省城防務漸紓馬德昭疊經諭令督兵赴甘著卽懍遵前旨卽日趕緊馳赴慶陽與熙麟籌商攻剿毋再遲延致干咎戾曹克忠由咸鄆交界一路疏通糧道並可與省城就近隨時策應所有三堡及牛東等處之投誠反正各村民人難保非因曹克忠兵威較振希圖苟免著卽飭令該總兵察其誠僞隨時嚴防毋稍大意如果係良懦漢民爲逆回迫脅者自應寬其既往予以自新多隆阿前奏雷正綰之軍因涇陽三原等縣尙屬匪巢林立未可輕

動並令專力嚴防北山西路一帶仍令王夢麟統兵往救鳳翔所
籌甚合機宜著瑛棨仍遵前旨與多隆阿通籌全局相機辦理其
王夢齡一軍往救鳳翔兵力不敷仍著該將軍等酌度調派並催
督王夢齡星馳前往力解鳳郡之圍不得再有遷延退縮致干重
罪漢南軍務緊要毛震壽辦理久成疲弊漢郡此時仍被賊圍而
毛震壽所部健武營又被賊衝蹋於高家嶺等處並有藍逆分黨
過河以至馬鬣灘及茶鎮一帶逼近石泉瑛棨所奏亟須統率得
人以圖振起尙屬實情李桓計日可到陝南見在行抵何處著卽
懍遵前旨迅速趨行抵陝後所有該處一切軍情卽著李桓自行
馳奏並著將興漢軍務悉力整頓詳細馳陳渭河搭造浮橋曾否
集事沙窩高陵等處進剿情形如何部勒著多隆阿隨時馳奏以
慰廑念將此由六百里諭知多隆阿雷正綰穆騰阿瑛棨並傳諭

李桓知之○明緒等奏塔爾巴哈台巴克圖卡倫之外有俄兵三四百人隨帶器械礮車在彼居住意欲先占地方潛立石壘派員前往曉諭令其將兵隊撤回該國帶兵官執意不允見已行文西悉畢爾衙門令其撤隊齋桑淖爾有俄國派兵數千人耕地蓋屋並赴各游牧收服眾哈薩克之說奏入諭明緒等探明確實情形一律防範○是月豁免江蘇太倉等八州縣本年額賦緩徵山西霍州等十州廳縣榆次洪洞二縣節年民欠倉穀並貸遼州等七州廳縣歉收倉穀